



نور المعموري
https://t.me/Providin_gbooks

Selfie

العمل الحائز على جائزة ساقية الصاوي التشجيعية



دار العلوم للنشر والتوزيع

أسم الكتاب: selfie

اسم المؤلف: عمرو حسن

الطبعة الأولى: يناير ٢٠١٥

تصميم الغلاف: أحمد فرج

مدير النشر الأدبي: سيد شعبان

التنسيق الداخلي: رفعت حسن سيد

دار العلوم للنشر والتوزيع

ص. ب: ٢٠٢ محمد فريد ١١٥١٨

هاتف: ٠١١٤٤٧٦٤٠٠٠

الموقع الإلكتروني: www.dareloloom.com

البريد الإلكتروني:

daralaloom@hotmail.com

[Facebook.com/dareloloom](https://www.facebook.com/dareloloom)

Twitter: @dareloloom

جميع الحقوق محفوظة

رقم الإيداع: ٢٠١٥/٢٨٥٨

الترقيم الدولي: ٩٧٨-٩٧٧-٣٨٠-٤٣٦-٧



إن الآراء الواردة في هذا الكتاب لا تعبر بالضرورة عن رأي دار العلوم للنشر

يمنع نسخ أو استعمال أي جزء من هذا الكتاب بأية وسيلة تصويرية أو إلكترونية
أو ميكانيكية بما فيه التسجيل الفوتوغرافي والتسجيل على أشرطة أو أقراص
مقروءة أو بأية وسيلة نشر أخرى بما فيها حفظ المعلومات، واسترجاعها من دون
إذن خطي من الناشر



الديوان ده مش شعر ولا نثر ولا حاجة خالص ، انما كلام
مش مترتب اتقال عند دكتور نفساني ورتبته هنا ، اكتب
كله في الليل ، غالبية ف الشتا والخريف ، وبعضه ماعرفش
انا اللي كتبته ولا الدكتور ، كلام عنها ، وعني ، وعنكم
سلباً وإيجاباً ، وعن أصحابي ، وعن متلازمة البكا المسائي
اللي دائماً بتبدي بـ مالك؟ وتنتهي بـ " مافيش " وعن
حاجات تانية ، ، ،

قاللي " مافيش حاجة مالهاش علاج " ، أداني
سيروكسات ١٢,٥ واندرا ١٠ وقاللي ابعد عن العصبية
وركز في شغلك وهتكون تمام ، يومها قبل ما اروح قتلت
اتنين صحابي في مواجهة بالكلام ، عاتبوني وفضحتهم
فيهم ، ماتوا وماكانش قصدي ، ولحد دلوقتي لما باشوفهم
باقرا الفاتحة واكمل مشي ، قولتله لو استمرت على كده
مش هيفضلي حاجة خالص ، قاللي اكسب نفسك واخسر
كل حاجة ، بس . . . وعنها يامعلم ، مسكت القلم والورقة
وكتبت اللي حصل بالحرف ، بالأوض المقفولة واللمض
النيون والسريراير والفتارين ونمر العرييات ، عارف!
" الاعتراف بالحق فضيحة " في غالب الأمر ، يعني

هيعاملوك على انك سكران بتهلفظ وهيصنفوك فاشل
اجتماعياً ومنبوذ عشان مسلمها لقلبك ومش بتعرف تقتل
القتيل وتمشي ف جنازته

الكتاب ده كمان فيه الشوية الحلوين اللي ف الحدودة ،
اللي فضلوا من الصحاب ، واللي فضلوا مع الصحاب
بالعشرة والمعاملة

اكتشفت ان اهم التفاصيل في حياتي إلي جانب أمي
وحبيبتى " بعد حذف أبوها " هي الأشياء البسيطة واللي
عمري ما ادتها اهتمام ، مثلاً انا عمري ماقولت للمج
الفخار " شكراً " مع انه سايبلي دراعه طول الوقت
وعمري مابصيت فيه الا ودقت فرحة ، جربت مثلاً تقول
للتلاجة " بحبك " أو تقول لكلب الجيران " ربنا يخليك ليا
ومايحرمني منك ، أو تقول لفوار الحموضة " جميلك ده
على راسي ليوم الدين " !!

ممكن تشوفوا جرعة الحزن كبيرة ، انا مش عارف انا بكتب
العمل ده عشان انا تحلّصت من الحزن ده ولا بنية اني
اتحلّص منه معاكم ، بس الأكيد ان المشاركة بتخلي النتائج

ممكنة وقيد التنفيذ، والواحد لو ما تكلمش ممكن يتحول
باب أو فازه أو انبوبة اختبار، والطبيعي ان الحزن يتحكي
والفرح يتعاش . . .

ممم، من الأول وانا بقول بلاش تقديمات لاهتودي ولا
هتجيب، اتفضل اقرا الكتاب ولما توصل لآخر صفحة
استنى لحظة وقرر، لو انت ماحسيتش في الكتاب ده بأي
شيء مشترك أو ماحسيتش اني كتبتة بالنيابة عنك وانك لو
معاك القلم كنت عملت نفس العملة، سيبه فوراً واهديه
لصديق من نفس سلالتى، او اسند بيه رجل ترابيزة السفرة
عشان متميلش بالأكل، او اعمله غطا للخابور، او سيبه
ف البلكونة مع الكراكيب لحد ما يموت م الشمس

ملحوظة :

هذا العمل، يحاكي الواقع وأي تشابه بين أبطاله وبعض
الأشخاص مقصود وموجه، ولا أنصحكم بتداوله، إلا
بدافع الحكى والفضفضة، وبس

عمرو

، ، ،

لأبويا اللي كتافه جبال خير وعيونه سمار من طمي النيل
ولأمي اللي انتصرت ع الليل وادتني الحلم بدون تأويل
ولإبي وحدوة ولشكيب ، ولبوبوس ولمادو وموسى
ولإيمي ونادية ولشاهندة ولكل بنات المحروسة
ولماجدة وحكمت ونبييلة . . أنهار من حضن ف توب
ستات

ولباسم يوسف ولفودة ولريم ماجد زينة الحلوات
ولميدو ومعتز وحازم ، ولصفوت ولمروة قناوي
لهشام زكريا ورامي عصام وأمير يوسف وبقيت حاوي
ولكل الابيض ف الاشياء ولكل تي شيرت زملكاوي
ولسامي ف سجنه وكل شريف ، سجنوه من غير أي أدلة
ولكل مهرج ضحك حد ف عز مادنيتنا مملدة
ولأروى وسيكو وللفرقة ، وكريم كوكو وامجد وريهان
ولها مجدي ومروة عرفة واخواتي ف كل زمان ومكان

ولتوتا ومجدي وعم غريب ولكابتن عبده ودربالا
لمحمد جعفر وام سمير وشريف غالي سوني رحالة
ولاخويا محمد وليتي ولأمّح واحمد آل صلاح
وصلاح مرسى الراجل الطيب أبو شمس بتطلع كل صباح
ولوائل عامر ولـ زبما لاحمد مختار وليحيي نديم
ولحفني ومنعم ولـ حوا وعصام السقا وحرف الميم
ولبكالوريوس انا ماعرفهوش
ولقرش حشيش شافني ماشوفتوش
للجاي اللي انا عشته ف عقلي
والماضي اللي انا لسه ماعشتوش .

ابص بقلبي لعنيها ، عنيها جماد ما بيحنّوا أكلم ربنا عنها ،
تكلّم ربنا عنه !!

كل الحاجات الحقيقية لازم تستخبي من الناس ،
هيتسهلكوها بحثاً وهيتكلموا عنها كثير أوي لحد ماتبور ،
ما اعظم الضل ، اعمل كل اللي بتجبه من ورا الناس ،
ماتعلنش عن متعتك للعام ، خبي تفاصيلك علشان تدوم ،
اول ما هتقول انت بتعمل ايه عشان تكون سعيد هياخدوا
اللي انت بتعمله ، في الأول هيجربوه وبعدها هيعملوا زيّه
ولما يزّهقوا منه مش هيسيويه إلا لما يفسدوه ويخلوه على
كل لسان ويفرغوه من محتواه ، عشان كده اقعدع القهوة
بتاعتك طول عمرك من غير ماتعلن ، قابل صحابك ف
قعدات نوستالجيا وفضفضة من غير ماتعلن ، وتحت هذا
البند تندرج القهوة والاغنيات واللحظات الحقيقية ، في
الزمن ده المبهجات بقوا يتعدوا على صوابع الإيد
الواحدة ، ولو خلصوا هينتهي العالم وهتتحول كلنا لأرقام
وزراير وتروس ومحركات ، تحبوا تتحولوا لمحركات !

مبدأً

بُعدنا عن بعض أوضح ف النظر

والعزلة برهان النبي أول ما يخرج للجموع

قربنا من بعض أبعد من كده

والشيع ف البعد بس عشان نجوع

عن نفسي باقلع حزني ع البوابة واخرج

جسمي البديل / الحزن

اسود غميق

شايل هروبي م السباق المرف الدنيا

شايل بواقى الخجل من كل شيء

شايل سنابل ميتة

قبل الشتا

وشايلني فيه

ما اقدرش اشيله واطوحه لبعيد
لان فيه صفعة أبويا وضحك أمني وحضنها
فيه العلاقة الوحيدة اللي فضلت من سبع طعنات واسم
واعرفوا من غير ما اعيدها للأبد
لما باحزن بابقى ناقص روح
واما بافرح بابقى ناقص جسم

من هنا وف عزلتي باكتب لكم عن قصتي
بابت لكم سلامات صحابي ف اغترابي
كل اللي شهدوا ع الكتاب
وسمعوا عبارات الوجد والشكر واللوم والعتاب
واتمکنوا مني في ليلة كتبتهم ووزنتهم
على قد جهلي بالميزان
على قد علمي بالنغم
وبقول لكم من عزلتي هذا الكلام:

مشهد ١

جيل التمانينات، شركاء الحياة والموت، أكثر جيل ضحك
وهو بيعيّط، العشر سنين الأوائل مرّوا علينا كأنهم طيف،
حلم سريع، ما كناش نعرف اننا هتخلّص حصة البهجة
كلها بدري كده، لو نعرف كنا قسمناهم بالتساوي ع
العمر كلهم بدل ما نخلّصهم كلهم ف ابتدائي ونقعد نندب
باقي الفترة . . .

سلام الله على الحارة الطيبة، بشكلها الكلاسيكي الغير
معقد، بشبابيكها المؤمنة وتفاصيلها البسيطة وسكانها
الأصليين، رمضان اللي بجد، الطبلية واللمه ع الأكل،
الفولكلور والألعاب اللي كنا بنصنّعها بايدنا، شكل
اللبس، الذكريات الواسعة، الواسعة جداً قبل ما كل
حاجة تبقى ضيقة، حتى الروح . . .

لكل الاشباح اللي خرجوا من اجسامنا لأزمان قديمة
يتفرجوا على مسلسلات تاريخية ويلعبوا السبع طوبات
ويعيّطوا بأداء جماعي ويضحكوا في المطلق . . .

المشهد

ليل خارجي، حارة الأقباط في شارع طنطا بمدينة الاسماعيليه

موسيقى

مقطوعة "ربما" للثلاثي جبران

الاضاءة

أبيض ممتد، ضوء أزرق ناسي على وشك طفلا أسمر

ديكور

بيوت دور واحد ودوريه، هشة أحيانا وأحيانا شباك بضلعتيه، عمود نور
ما فيهوش كشاف بس لو اتشال يضلج الشارع

الحالة

نوستالجيا

باكتب لكم

عن طفل يشبهني

يشبه ابوه اللي كان غاوي السفر والطل

وكإنه مفتاح للسّمار بيطل ع الأبيض

عن طفل يبقود الكتيبة ف الميدان

ويفطّم الأفراح عن الأحزان

للطفل عين بتبصّ ع النور بانتظام

والتانية مقفولة انتظار للشرح

ينظر للبعيد مجنون

يعشق خروج الشمس من جيب المسافر

أو دخول البدر ع المينا بهدوء

يحتل وزنه ف امتحان المشي على طرف الرصيف

ينزل ويطلع ينحني يثبت يقوم

يخسر معارك طياراته ع الرياح

يشكي همومه لنجمة ساكنة ف غرب بيتهم كل يوم

وسألت : هل كل أطفال المدن يبحبوا آخر العام؟

صورة ديسمبر لما يتحول شجر

ويهزُّنا بالليل؟

أولما كان بيوحه الأطفال لضوء مبهر غريب

ضوء الكنيسة ف انتظار العيد / يجوز

أو خطو بابا نويل

لحظة ما يدي الناس عطايا وينطلق فرحان

شجر الكريسماس لما يحتل المدينة بعنف

وينصهر فيها

ف الحواري

يسمعوا عن شكل بابا نويل

لكنهم مايسمعوش عن أمنيات بتتم

يتفرجوا ف السينما على أفلام بينزل فيها تلج

لكنهم ما اتفرجوش على تلج رطب حر خوفهم م الحقيقة

لحظة ما دق الجرس

خرجوا المصلين المسافرون ايدهم البركة

هب الولد

شارك صديقه الأكل والمطر العنيف

كانت مظاهرة خلق ع الاسفلت

كان الصليب

بيص من فوق البشر زي السما الثانية

وجناين الأمطار بترقص للصور

وتشارك الناس انتصارهم

كان لازم الطفل اللي عيط بيتسم

كان لازم المجذوب يطبطب ع العيال

فيدخلوه ف اللعب وياهم

أسطورة قالت : إن مجذوب المدينة

هو بابا نويل

بيقضي طول العام علي الطرقات وحيد / لحد يوم العيد

كانوا العيال بيدخلوه ف اللعب وياهم

علشان يمد ايديه ساعتها يحقق الطلبات

كان لازم الشعر اللي ساكنه

ينفجر صاخب

ويخط أول اغنياته بحس طفل

يمكن تكون مازادتش يومها عن خمس كلمات :

ربنا ، الليل ، حبال الطيارات ، صوت الكناريا ، المطر

من بعدها جربت أقول الشعر وحدي

وعرفت إيه معني الخطر

كل اللي فاكراه إن نجمة ف السما
كانت بتسكن غرب بيتهم كل يوم
يحكيلها عن كل اللي تم ف ليل طويل
عن ذكرياته البنت ف كتاب البراءة
عن وردة شافها بتبتسمله مرتين سابقين
وماكانش عارف ان كل البلكونات
بتعيش حالات بالشكل ده
وف كل بلكونة ولد
بيص على نجمة بتسكن غرب بيتهم كل يوم

يشبهني جداً قلب هذا الطفل
دمعه المفاجيء ، والمنظم ، والخبيث
حبه الغريب للطيارات البوص
لحظة ماتخفض وشها لله
وكانها بتعلم الناس احترامهم للمقدس وانتصارهم بيه

موسي إذن ماوصلش للفرعون ف لحظة
اليم كان مُرهق أكيد بتحاوطه إيد من ضي
تملاه شكوك عن صدمته ف مقابلة الفرعون
وكإنه بيمثل آماله ف ابراهيم
وبيسأل الله عن ندى قبل امتحان النحر

يمكن عشان الرحلة دي ، وعشان جنون الشعر فيه
انشق ليه البحر .

خروج ضروري

الطفل دمه بيكنس الشارع ويرحل مش بإيده

والخوف إذا صيده وقع ف الأسر بيبيده

أطفال ضحايا الحزن قوت الظلم وعبيده

الرحلة طول ما السير طويل بتسير وراه

والأعمى يبطل نظر من صدمته من شيء رآه

أوقات يبان الحزن نور من شدته والضحك آه

والسكة بتغرُ الولد بين ضلعه ووريده

{هامش}

أول كلامي لجدي : أزيك!
الدنيا مع غيرك بدو فرحة
وحشني جداً كلامك ضحكك ليا
جلايتك والسبحة والطرحه
حجرك ياتينا اللي كان مفتوح علي الدنيا
حواديت ولعب وكلام أنا مستحيل انساه
تصحي ف نور الفجر باللحظة والثانية
تتوضي وتضلي وتقومني تبني حياة
كنتي كاتك شجر وصل السما الثانية
أو كنتي زي المطر نازل بأمر الله

وحشاني يا جدي
فيه كلام كثير متحاش
كبر الأمير واتهزم
وأميزته ماقابلهاش

والديب هجم ع الغنم

مافضلش فيهم سوى

واحد ضعيف هو أنا

قرر يموت قام عااش

الراديو لما اترمي عيطت يبجي يوميه

صندوق بججم السما شايل غناوي دوريه

فوازيه وحلي وأمل بنوّة بصفيريه

وبراءة عااشت زمه ماتت في غمضة عيه!

آخر كلامي لجديتي: سلامات

باللي انتي فوق انما لساكي في عنيينا

عُمر النفر متنا مش كونه عااش أو مات

لكه بطول قعدته في السيرة حوالينا

وحشاني يا جديتي، ما تكفينيش كلمات

لكني لو هاسمك.. هاسم كذا جنيّة

مشهد ٢

احنا اللي بيسمّونا الأقاليم ، بلاد فضّلت تكون دراع أو رئة
على انها تكون الراس ، بلاد منزوعة الماكياج عديمة الآلة ،
مفرطة ف البهجة ومختلفة ف اللهجة ، بلاد بتخبى الشمس
ف كل بيوتها القديمة وتطلّعها كل يوم حبة حسب
مزاجها ، لكن لاسباب ما اقدرش اطرحها لانى
ماعرفهاش ، بنفوق على ساعة فجر شايلىن فيها أحلامنا
وأهالينا وشوارعنا القديمة ف شنطة كبيرة وبنمشي ف اتجاه
العاصمة كإننا مرتزقة ، ملعونة الأحلام يا أخي ، بتغرّب ،
بتخلينا نمشي ف جيوبنا صحاب زمان وأدوية الاكتئاب
والوحدة ، علي أي حال " طوبى للمغتربين في بلاد
لاترحم "

المشهد

نهار خارجي، موقف أتوبيس الاسماحيلية القاهرة

موسيقى

أغنية "دوريني" لفريق المغني خاتة

الاضاءة والديكور

لا يوجد

الحالة

سفر

عن حلم نورس فات بلاده البحر
قاصد بلاد فيها النوارس خطيئة
مجرمة ف حق الأبرياء الطيبين
وبريئة عند المجرمين
فما أغربها
مجرمة . . بريئة
تحريك بروح الغلابة ف الطريق
وتقتلك بنفس الطريقة
على باب مدينة
أهلها بيناموا بعد العصر / جيت
سلمت على كل اللي شبيهي
وابتسمت بكيت
على باب مدينة
أهلها بيعيطوا ف البحر أو بالبحر أو للبحر
بصيت ورايا

شُفَّت المدينة بتسلّم عليّا عند كارتتها

وقالت لي : آخرتها .

نفضت شريطها /

وفرطت ضفيرتها

وسابتني اشوف كل اللي سييته ف الطريق

ف الطريق

برتقان بيطل من حجر البيوت

زي العيدية ف اختبار الفجر

عازف سواحلي من رجال السمسمية ف المقاومة

بيقدم استعراض مؤثر للي من بره المدينة

وبقوة فراشة

كان يرفض أي خمسة جنيه يكرمها الغريب

ويحطها ف ايده

بحر بيعيط محار ويكح موج مالح
توتر على الكورنيش
باسميه الهوى الأول
أو انتصار الفولكلور علي موجة التحديث
ف الطريق
تقدر تقول الأغاني بلهجة خاصة
خاصة جداً
يعتبرها الناس غناك المفرد الجمعي
أو نشيد لخروجك المعلن من الصلصال
تقدر تبص من البيوت الضيقة ع الراحلين الصبح
وتشوف ف عينهم شيء
يخص الغربة
والرحلة

أنا كنت زيك زمان

بانظرلهم من عين بيوتنا الضيقة

ماشيين ف حضن الفجر قاصدين المفاجأة

بيدوروا على شيء مايعرفهوش

وكان سرب من الطيور

مختار بلاد مابتديهوش سبب المجازفة

حط العجوز ايده على اكتافي :

- حافظ نشيد الراحلين الصبح؟

- أيوه

- غنيّه

ماتقولش ضاق بينا المكان

قول ضيقنا بيه .

و كعُرف مش عارفه

كان اللي راحل م المدينة ف اتجاء الضوء

بيترك قلبه ف الامانات ويمشي

وكان مطب

واقف ببيكي ع اللي خرجوا م المدينة بعد متر

و المحصل

بيبص ف وشوش اللي خرجوا ببطء

و كانه بيعلم وشوشهم علامة

يقدر إذا فاتت سنين

يوجد لها بسهولة

قلت :

لوقمنا بحذف ال " ك " من كلمة هناك

هل كانت " هنا " هتشدنا؟

هل كنا هنرضى بالأغاني الموسمية؟

باللجوء لله علي شط القناة؟

بالصور ف ألبومنا؟

بالدبلة الدبارة ف كف بنوتة؟

هل كنا؟

هل كنا هنصبح ميالين للشعر مثلاً؟

الشعر أفرحنا وأحزاننا

إعلاننا للأحداث بكتماننا

جلابية الفقرا اللي انا منهم

الشعر بالنسبة لسواحلي كل مايملك

الشعر والنوة وفراق محتوم

هما اللي ممكن يحنوا ضهره هناك

ياحزن السواحلي

لما يمشي ويدي ضهره لموج يطرح ملح

ياحزنه لما ينشطر نصين بعاد

ويخلي قلبه بين بينين

وكإنه ف الحالتين بيمد روحه للسفر

ويهز قلبه ف لعنته

خدم السواحلي كل شيء

الا اعتزازه بلكنته

وماتسألوش عن موت هيبجي ف الطريق

أو ليل هيطرح فجر مش مفرح

ماتسألوش لو قلبه ف الرحلة اتنفض

أو زاد سعة

لوكانت الغربة اللي داقها مرعبة

أو ممتعة

بس اسأله : ليه الشُّنط

بتحب تهرب من أصحابها وقت حزم الأمتعة؟ .

دلوقتي خارج للغريب

خارج وفايت كل شيء :

شكل أمي /

والمطر بينافس الدمعات ف عينها كل ليل

وبترمي روحها للتاريخ والذكريات

حزن جارتني

لما تقرباً بتفضل واقفة ساعة

حين ما يبجي الوقت وانزل ف الطريق للشغل

فتعيّط غُنا

وتفضي نص إزازة البارفان على هدومها

وتخرج قبل ثانية من نزولي

فماتلاقينيش

دلوقتي خارج وفايت كل شيء

موسم المانحة / جنون السمسية

بياعين الجمبري ف السوق / رقة الكروان ف عز الفجر

خضة القاعدين ف نادي الشجرة وقت القطر مايعدي

شكل الخديوي ف الميدان

سكة الاستاد

.....

وغيرها

مسحت دمة نزلت من عيوني ع المطب وقلت :

لو افكرت انساها

مش هانسي افكرها .

خروج ضروري جداً

خارج وسايب دارك المليانة بيك
هتسيب لمن أمك هناك من غير أبيك
والبيت إذا عدته غريب هيكون أبيك

الأرض واسعة ورحلتك مليانة نوح
وسفنتك المليانة جوز ينقصها نوح
جسد بيخرج م المكان وفايتلي روح

ودموع خروجك من هنا مسقية بيك

{هامش}

تَعْرِف تَفْرَح؟

بَا عَرَف مَاحَزَنَش

تَعْرِف تَضْحَك؟

بَا عَرَف مَابَلِيش

تَعْرِف تَبْزَنِي؟

بَا عَرَف مَانَدَمِش

تَعْرِف تَحْكِي؟

بَا عَرَف مَا اِدَارِيش

مَالِك؟

خَايِف

لِيَه؟

مِش عَارِف

مِش عَارِف اِيَه؟

مِش عَارِف اَحْيِيش

(سفر بشكل ثاني)

باكتب لكم من عزلتي

عن صاحبي صياد السمك

ساعة مقال :

ف العمر كام ثمانين سنة يستاهلوا ننزفهم

ثمانين سنة ف حجر الشوارع والبيوت

تعرف ، ،

كنت عايش ف البلد دي

لما كان الليل بيعجي في أي وقت ويتفرش ع الرمل

لما كان الموت بيظهر للفدائي زي ضله

كنت واحد م اللي مروا ببطء ع الشاطيء وغنوا

م اللي قادوا النار وفاتوا الدار

غصب عنهم

أو غصب عنه

ليّا حاجة ف كل حاجة ف البلد دي
كل دكة . . . ليا فيها ساعات من السرحان
كل ناصية حارة فاكراني بملاحي
قبل م الزوار يعلّوا ف البُنا
قبل م العمدان يزيد طولها خمس أمتار
وتعجز عن إضاءة حي باستمتاع
حجر البلد دي يتسع لكثير ولو ضيق
واسألني عن حجر المدن وحفاوة الأتباع
كل اللي عزّل منها مش منها
وصدقني كل اللي باع اتباع

المنطقي / ان اللي عاش ثمانين سنة بيصاحب الموج والقنابل

لما ييجي يموت ، يموت على شطها
المنطقي ان اللي قضّى حياته يعزف سمسمية
لازم يموت وف حضنه حاجة منها

الغريب ف الموت مهارته ف اختياره للنهاية

الطبيعي ان مثلاً لما ابويا يموت

يموت قاعد على الكرسي ف ايديه جرنال

بيصع الأخبار ويشرح لي الفروق الضيقة

بين السياسة والقمار

أو ف ايده اللايّ مايل ف اتجاه الشمس بوصلة

وف عينيه نظرة تأمل للطبيعة

مش يموت ف الفجر باصص للممرض

والمذيع الداخلي بيصحى كونسولتو العناية للنهاية

إن جاري حين يقضي نص عمره ف اختراع الفرح

أو ف الرقص من باب المجاملة للجيران

لما يبجي يموت يموت على صوت آلات النفخ أوع الميكروفون

مش يموت حاضن طبق ف بلاد غريبة

موتة الجرسون

باسأل عليك ف اليوم عشر مرات

فينك ياضل البرتقان وحفاوة المانجة

مارس ببيجي كل عام يسأل عليك

قلت لعيون عيل سألني ع الغنا:

ان الموسيقى

مش مجرد شيء بيوهنا السكون

هي أكبر من كده بكثير

يصحبنا صوتها ف اللقا الموعود أو ف الفراق

ف الخلاف والاتفاق

تخرج معانا م المكان وتطل بينا ع البعيد

صوت الموسيقى كان بيخرج م العجوز

يرسم حدود أبعد لتغريد المدينة

دمعته ضحكته

زي ليلة من ليالي شمال حزينة

هل كنت باحلم لما شوفته بيبتسم على ضفة الكورنيش؟

ساعة ما قال لي :

قد ماتعيط هتضحك

قد ما تسلّم عينيك للبحر تسلّم

يااه ، من غير غناك تعرف

فشل القمر ف الرقص ع الشرفة

وقفت بنات المدارس ف انتظار السر

ف انهزموا

من غير ماترقص بعد فوز الفرقة بالدوري

كل اللي دخلوا الاحتفال حسّوا انه ناقص شيء

على أي حال

يكفيك وجود عيّل سماره بيجمع البحرين

وبيجلط الضدين

يكفيني صوتك

وانت بتبيع السعادة للمشاة

كنت أول فرد يسحب م الوداع صك اللقا

وانت أول فرد يصنع

أرض أصفى من سماه

من هنا الكورنيش؟

يجوز

من هنا البلاجات؟

يجوز

قال لي:

من هنا أول طريقة للحياة

{هامش}

عم أحمد مان:

الصباح العالم صلوا عليه ف ميني الأوقاف

كان واحد م الناس اللي انبسطوا

ومشيوا خفاف

م الناس اللي اتكتبت بالجاف

عم أحمد كان راجل سكر

وعجوز فلتاه

تعصر مخه يتزل حوادث

تعصر قلبه / يدلق نسوان

لكه كان طبيب بزمه كمان

وحباله غلابة ومحازة تعيش

خاله وايمان

خاله / كان طالب في الجامعة

انا حلي ما اسمع، طالب في الدفعة الثالثة علوم

عم احمد كان يضحك ويقول :
 ده هيطلع ايه.. يملكه بلعوم!!
 اضحك / يضحك / ينتابه سعال
 يهدى شوية ويشرب منه.. أخيه يا حيال
 ده الواحد عجز مش دريا
 كان بنته ايمان معهد سنتيه
 والحاجة مراته ادلها سنين ما بتتدركش
 اما سألته عيانه بايه
 قال : ما يخصكش
 ورتقني في خاتة اليك وقال : اشرب يا خفيف
 علي قد ما يبياه متسلط
 علي قد ما كانه منه جوه نضيف
 عذنا في الحنة ما فيش انسان
 الا وعم احمد يوحى عليه
 ويقولك انا هنا مع ياما
 مع قبل الوالدة ماترق بك
 مع قبل ما فيه عقلة صابح تطلع في ايدك

عم احمد كان عم الطاولة

ومالوش مسكة

ومحال تعرف هتفاجئه منيه

بيجيب أجلك ف مسافة مايشد الجديده

كان يشبه مصدر ف تفاصيلها

فرحاه وخريره

طيب تعرف

المكنة بتاعته اما اتوفي

مايقتش تدور

حتى النصارة اللي لابسها بشنبه مكسور

لو واحد غديره يجريها

مايشوفش النور

عم احمد مات

وفهمنا حاجات ساعة موته

فيه ناس بنشوفها مانعرفهاش

غير لما تموت

وسيرتها تدور على كل لسان

وقتھا بس بتعرف اصله

وتعرف اھله

خاله وايماء

وتقول بينك وما بينك نفسك

مش كنت حاضنته وخذت بايده وخذينا!

في حاجات بتياھ جوھ عنيئا

مانحسش بيھا الا اما تغيب

والفازة بتلكسر اصلاً مہ غير ماتسب

الفازة بتلكسر اھمال

والناس بتموت طمعاً ف سؤال

عم أحمد مات

وفتحلي مجال

كام واحد عايشه ف الدنيا وما بنشوفهوش

كام واحد ميت راح يدفنه عالم مماتوش.

المشهد ٣

أول حب ، الكم اللامتناهي من السذاجة المنظمة ، الظهور الأول للدريالين بشكل غير مدروس ، ضربات القلب السريعة والرعشات الخفيفة الحقيقية ، أول حاجة ف كل حاجة ، الخيال الوردي والبراءة المطلقة ، التوتر البيولوجي العجيب ، الهزيمة الفادحة بعد أول فراق ، الصور الكثير اللي ماينفعش تتوصف أو تتقال ، الفترة اللي بتتربط في خيالنا بأفلام أو أغنيات أو مشاهد غير مرتّبه ، الارتباك لأول مرة ، البهجة اللي بتخلينا نغسل الأطباق وننصف أوضنا ونعدل براويز الصالون ، الفيلم القصير جداً اللي بنترعب واحنا بنكتب نهايته ويكون أول حرف ف متلازمة القرب والبعد ، وأول خطوة ناحية الاكتئاب المزمّن

المشهد

داخلي ليل (مخرفة)

موسيقى

طيري يا طيارة ل فيروز

الإضاءة

أزرق سماوي، خلفية أحمر قاتم

ديكور

غرفة غير منظمة، دولا ب مفتوح، كرسي خشب قديم، مكتب صغير،

وروق كنير

باكتب لكم

عن بنت واحدة طيبة

هي اللي قدرت تخطف الشاعر

وتكمل اللوحة اللي نقصت لون

كانت بتشبه قوس قزح

لحظة ما يصغ طرف فستان الصبية

وينطلق مكسوف

قالت : كإن المطر ماعرفش غيرنا يا حبيبي

تفتكر ممكن ف ليلة صيف هنتفارق؟

كانت إذاعة (F.M) بتبتدي الإرسال

وبتبتدي فيروز صباح الجمعة زي النور

أو زي صاحبي ما قال عليها / موسم الغفران

" طيري يا طيارة طيري يا ورق وخيطان "

كنا ف ليلة صيف ليلتها
كانت عنيتها بتحوي شيء مجنون
والشارع المرهق بيعرق ليل وخوف وسكون
فردين يمشوا ف آخر الشارع
بيفصلوا الأغنيا عن ضحكة الفقرا
وبيمزجوا الشعبي بصوت فيروز
يمكن يكون الركن ده
موقع إلهي للتححرر والتواصل
هنا
قالت باحبك واختفت
هنا
سألتني عن عشق البنات
وجاوبتها هل في بنات أصلاً ف هذا الكون سواكي؟

ضحكت هنا

وورود خدودها لونت خلفية الشارع هنا

أول دخول بصراحة ف الممنوع هنا

آخر دموع تنزل فرح كانت هنا

هنا كل شيء كان بيننا كان

بس الليلا دي كل ده ما حصلش

أمي اللي يومياً بتقطع ورقة ف بلوك النتيجة

سألنا باستغراب : هل حد قطع ورقة بتاريخ النهاردة؟

قلنا مش فاكرين

بس الحقيقة رفضت أقول السر

يمكن تشاؤم من فراق هيكون

أو خوف لا اقابل إتهام بجنون

أو سيل معارضة

الحقيقة اني اكتشفت الصبح

ان النتيجة ماكانش فيها ورقة بتاريخ النهاردة!

كان كل شيء يقول هنتفارق

كنا ف ليلة صيف

قالت : باحبك

بس مش ممكن نكون فردين على نفس السفينة

نزلت دموعها بانسياب يوجع

واللمبتين فقدوا البصر فكأن نورهم ضاع

كانت إذاعة (F.M) بتنهى إرسالها

فيروز ف نفس الوقت ختمت

بنفس اللحن والإيقاع

" بدّي إرجع بنت صغيرة "

وف عينها شفت السفينة بتكملّ نزول للقاع .

{هامش}

المكان : وسط البلد في القاهرة

أما الزمان فمع زمان

قصة حزينة مؤثرة

والقصة دي كان يا ما كان

بنت بضيعة ومريّة

ومادام في بنت ف فيه وله

بيص م الشباك عليها لما ترقص ف الخلا

منحلتله مرة منحلها

حبّت حكايته وحبها

حلفوا انهم هيكملوا

كانوا كل يوم ييمثلوا

روميو وجولييت والقدر

سافرت ف رحلتها الطويلة

وهو ما باليد حيلة

كان كل يوم يجمع لعبهم في الصالون

واهلكه شافوا ده جنون

منه يوم ما سافرت قوس قزح

بقي ناقصه لونه

المكان : وسط البلد في القاهرة

أم الزمهر في حالياً

نفس المكان علي قهوة بلدي

قاهر حزينه مسترخياً

كوباية شاي واتنبيه جنينه

وقميص كارهه مكتوب عليه

انا حبيبتك.. سيبينيني ليه؟

عدّات قصاده وشبهت

وبعد حبة انتبعت

اه الزمهر غدير كثير

مشت هو ده نفس الأمير

ولا هي طيره

أيد منك مع واحدة غيره

وهي حيت حد غيره

وكع سجارته ف الهوا

دخاتته رستمهم سوا

أنيه صغار بنت ولد

الحلم مات لما اتولد

مع وقتها والقاهرة

زعلانة مع وسط البلد.

باكتب لكم

عن شاب يشبهني

عاشق هدوء القصيدة ورقة الإيقاع

يرقص على الخيط الرفيع

بين شعوره بلذة المشوار

وخوفه من عيون المارة وقت غروب

الشعر عند القاصدين الشعر / لوحة

واقفة ما بين حالتين

إما بتستر أو صريحة

والشعر عند الممنوحين الشعر / لقطة

مفضوحة حتى غموضها

أوغامضة بفضيحة

تقدر تقوللي يعني ايه الشعر؟

قلت :

طعم أول رشفة ف الشاي بالقرنفل

لما يصطاد البنات الهربانين م المدرسة

ويزقههم على رحلة السيما والرقص ف الطريقة

شد آخر ورقة ف بلوك النتيجة

وشعورك المرهق بعام فايث وعام هيطل

أو صحبة الحلوة اللي تمت سبعة من شهرين

وبقالها مورد شبه ثابت

من تجارة الفل

أو.....

ايه؟

تقدر تقوللي الشعر ايه؟

كان شاب يشبهني

بينهي علاقة بدأت وانتهت ناقصة

كان يمكن الضوء الخفيف

والأغنيات الناعمة سر وجوده وياها

- بتحبيني؟

- ماعرفش

بس الأغاني الملهمة كانت بتبدأ من هنا

قلق الصواب ف السلام

أول ما اشوفك كل حين

قلبي اللي كانت تقسمه الطواحين

لحظة ما اواجهك بشيء كان نفسي اقوله لك

- بتحبيني؟

- ماعرفش

عارفة التعود ع الموسيقى الطيبة الناعمة ،
وبراعة القديس ف لمس المخطئين بشوئش
صوت المؤذن لما يوهبنا الأمان ويشدنا للصبر
- بتحبني ؟
-

كان الصراحة الجو
لايقع الفراق
برد انتصر بجنون علي الأشياء
أمطار بتنزل باضطراب وهدوء
والليل بيوصل منتهاه
كانوا ساعتها
كل واحد ف اتجاه
بيصوا من على قرب أبعد ما يكون

والمشهد الناقص يكمل

زي ما اختاروا

هل يرجعوا حبيين

يفصلّوا اللقطات بشوقهم

أم يكذبوا كدبة (صداقة بعد حب)؟

إحترت

واحتاروا

دخلت ف شارع جانبي

وانساب ف شارع جانبي

أول ما حسوا بانهم ما انهاروش

إنهاروا .

ممکن تكون علاقات بهذا الحجم هي الشعر .

أو يمكن يكون الشعر ضوء خافت

لستَ كفيفة بتخيّط هدموم العيّلين بالليل

أو يمكن يكون الشعر؟؟

- يمكن .

عموماً

ف السفينة شرح واحد

واحنا دورنا نتنصر للخضر ، نكتب

نتنصر للفعّل ، نكدب

نكتفي بالشعر ، نسهب

أو نحافظ ع اللي فاضل .

احنا دورنا الصيد بفتنة /

واللي يقتل شخص عاجز

مش مناضل

خروج

بتفارقك البنت اللي كنتوا بتقسموا الليل كل حين

داكم بكاكم داء مايرضيش جراحين

ففارقها احسن قول لها : لو تسمحين

رجليك وصارت تقلها أثقل من البركان

والصبر مايجيش بالطلب أول ماتصبر كان

الصبر على أرض ف عنيك لو طميها بور كان

وانظر معاني الصبر ف عيون فلاحين

{هامش}

انا لو هاقول ع الفراق

هأبدأ كلامي منه!

والشعر قال ياما عه الفراق بالعيه

وقال كلام أكته عه برد صاب الاديه

والشعر قال ع الفراق

انه الوجع بالليل

وانه البكا والسهر

وانه السلف والديه

وقال ف باب عكته

"إه اللقا فراقيه"

أوقات خسارة بفوز أو نصر بهزيمتيه

وكثير كتب ع السبب أو ميه مودّي لفيه

الشعر وصف اتنيه كانوا زماه واحد

لكنه ماوصفت واحد

كمل حياته " اتنيه " !

من يئنا المظبوط لصحكننا ع النيل
من حزننا المبسوط لحزننا في رحيل
ومن عيال جرحاه يبعثوا بالبعد
رجالة أوبة صحيح بس احنا مش تمانيل!
الراجل العادي

وقت الفراق عادي
يعني البعاد ده نصيب والرك ع البادي
ويقول لها اسف واتمنى ليكي الخير
وانا ماشي وانا عارف انك هتبقى لغير
ويروح يكمل سير مع واحدة بتنادي
ده الراجل العادي!

أما الرجال بصحيح وقت الفراق يتموت
العشرة ليها جلال ومحبة بنت بنوت
ف زمان بهذا الشكل م الصعب تلقى شريك
نادر تلاقي بنات جرحاه وينوا بيوت

بست اللي له أثره والعامل المشتدك

اللي البعاد كسره وسابه ينفكر

هو الكلام بينكم ووصفكم للبيت

وشكل أوضة الولاد

ولون دهان الحيط

بتحب تاكل إيه

وهي شاطرة ف إيه

والحضة وقت الشتا وحبيب ايدك ف ايديه

سألني صاحب وقال : إيه أصعب الأشياء

قولت ان حد يروح وتبكي منه عليه

طميني

عاملة ايه؟

كلميني عه حياتك يعني عاملة ازاى بدوني

لسه بتحبي الشوارع والمطعم والمبلوليه؟

لسه بتحبي العيال الشحاتيه الطبيبيه؟

لسه بتحبي المراسلة بالحنيه!

مشت هاقولك اسمه إيه

مشت هاقولك هو ميه

اخذنا بنكمل حياتنا بناس أساساً حلم غيرنا

غيرنا بيلكمل حياته بناس أساساً حلمنا

لولا إني بجد مؤمنه كنت أقول ده حرام بجد

بس انا عمري ماياكتره شيء يجيبه ربنا

باسم كل الناس معايا المجروحيه في القلب جرح

باسم من بصر في مراية شاف ملامحه ناقصها شرح

نخل شوقنا جريده خوفنا.. نخل رامي الخزن طرح

كل واحد ساب حبيبته

ثم كمل شيء بدونه

كل واحد معهما يضحك

تلقى فيه دمه في عيونته

الفراق قسمة ونصيب

واخذنا مضطربيه نسب

الفراق والله لعنة

نشكلي للرحمه وجعنا

نحكي للناس دون ما نجرح

لو خرجنا او اندرنا

اذكروا حسه اللي سابكم واوعى مره تشوهوه

واخرجوا به اتنايكم واحنوا خوفكم واقتلوه

واضكلوا يملكه تلاقوا

حلم بكمه تكملاه

باكتب لكم

عن بوح قديم يشبه صديقي . ،

كان صديقي شاب ف الستين

بص بهدوء ع المشهد المحزن ومل من الكتابة

قال لي :

عصافير بتخرج من بيوتها المغرمة

وبتصنع الروح سيمفونية

والناس ماهيش حاسه

الناس هنا

زهقت خلاص م الحلم

والبوابات مقفولة قبل ماتنفتح

الناس هنا مابقتش قادرة تبسم

ف اكتب مين؟

قلت : نفسك بيخرج ف الكتابة

رجليك بتقوي ف مشيها بعد الكتابة

صوتك بيعلي ف الكتابة

سلم ايديه للقهوة وسألني :

سمعني آخر ما كتبت؟

(شب الولد للبعر واستسلم لترحاله

والعلم سر الشعر ف شعوره وأوحى له

كان الصديق والريق لما فترجاله

خط القلم للجميع والشعر يعنيني

كُونت صورته بملامي وقلبي وعينيني

وعانيته قبل ما يبتري حتى يعانيني

(الشعر شعر يا صاحبي في كل أحواله)

قلت لصديقي :

أشياء كثير هي السبب ف الحزن

صدقني

قاللي : تفكر نقدر نعطل موت ونكسب روح

تفكر ف بلاد بتتحدى الكتابة بعنف

وتشتهي كسر الولد ف بيانو من حقه

ازاي هنكتب؟

كنت باشبه طفل نط بخفة م الرابع

عشان يحسب مسافة اسمها " لاشيء "

قلت ف خيالي :

أد ايه خاننا المجاز وصنعنا عالم مش بتاعنا

ياأيها الشعراء

طوبى لكم طوبى

قادرين برقة تمدحوا السكر والفاكهة معطوبة

مانزلش عن ظهر الحصان

غير اللي خان ياأصدقائي

انتوا المسافات الأخيرة للبنفسج

ريحة التواريخ وهي بتتحر حاضر وبتنطلق للجيّ

قلت لصديقي :

تفتكر نخرج بحفة ونسحب م اللحن

قال : لو بايدينا لاخترنا الخروج منها

قلت : لو كنت مش كاتب هتصبح ايه

قال : مراكي بيتدي اليوم بالمفاجأة وينتهي بالحظ ، وانت ؟

قلت : نورس

وارمي نفسي لأي بحر بيعشق الأناشيد

نحتفل بالليل وبالعام الجديد

ونحط روحنا كالقدر علي جيبة الحلوة

يمكن ننول أشياء مانعرفهاش

كان صديقي شاب ف الستين

يصدمني ف اكتب

يبي سور من ليل قصادي انتصر واعبر

أصبر ف يقتلني بهدوء

يقتلني فاصبر

بس النهاردة كنت مش قادر

كانت بوادر يأس ما اعرفهاش

كان ليل بيخرج من عيون الطيبين ع القهوة ويانا

وبينصهر فياً

قاللي جملة لو ماقالهاش وقتها

كنت مررت الورق بهدوء ف كراستي

وانسحبت

قاللي :

سمعني آخر ما كتبت

خروج

مش بس فرق العمر يفرق ف الأغاني والورود
لكن ساحات التجربة والوقت بين لفتة وشرود
النار بتصطاد التاريخ أول ما بيصيبه البرود

لكن صديقي كان مكان بيسير ف كل مكان
بيونس الليل بالقصص لو ونسُهُ ف الإمكان
بيقدم الخبرة لصبي ويقولهُ كان ياما كان

والشك بيصيب الفتى كل اما يمشي يعود

باكتب لكم

عن أصدقاء بيكونوا من سطوة الدخان مكان

بيقسموا الوقت اللي بينهم بالتساوي

أصدقاء واخدين مكان ف الكادر بإرادتي

وكانني لما نويت أغرب قلت اقرب

أصدقاء

ماخطرش علي بالي اننا نصبح روافد عند نفس النهر

والناس يمارسوا الفولكلور علي شطنا بهدوء

الاسم : اشخاص بتخرج من دواير شك للراحة

السن : مايكفي من الليل والبلوغ والحب

المهنة : لازم يكونوا بيرقصوا زيي ،

مع اختلاف نوع رقصهم حسب الأماكن واللغات

الأيدلوجيا :؟؟؟؟!!

يا صديقي

تفكر ان الشوارع بدوننا ليها طعم

انا وانت آخر ليل بآخر روح

انا وانت احساس البجع بالرحلة والتواريخ

صخرة كوميديا بتنكسر من موج خلافتنا واختلافنا

دلوقتي واحنا بعداد ماتت عجيش

انا سبيت بصمة ايدي ف الأوضة

علي محبس المية اللي ف الطريقة

علي اوكرة الباب اللي كان لوينفتح

تدخل عيال

من كل صنف ولون

يا صديقي

لينا ذكرى من خلالها نصنع احنا الكون

يا صديقي

ف الشوارع شيء يشبهنا افكرتك

كنا من أيام بنمشي ف الطريق

متطوحن بالحلم

متلونين بالأغنيات اللي ابتدت بينا

قلتلي : تشربها ايه

قلتلك : مضبوطة كالعادة ،

وهل ممكن نغير ذكريات الملح ف السكر؟

هل ممكن نحن لطعم غير طعم اختيارنا لذكرياتنا؟

كان المطر بيزور مدينتي ف يوم

ويزور مدينته ف يوم

بس كانوا الزرعتين يشبوا ف بيوتنا

زرعتي تسبق ساعات فتشدد روحها فوق ضلوع البيت

وتسكن ف التراس

وساعات بتسبق زرعته

فتمد فرع بيتدي من عند بيتهم يمنا

ياصديقي

فرق الأماكن ف شرعك مش مسافة

وهناك هتحصل حاجات بتبدأ من هنا

قلت له :

يمكن ساعات بنحب روحنا ف شيء بيكرهنا

قال لي :

وكثير قوي نكره حاجات بتحبنا

خروج

ياصاحبي انا وانت يادوب واحد صحيح باين

انت المدين ف الرحلة دي وانت كمان داين

باخشى لقما من غير سلام واخشى فراق حاين

صاحبك إذا صاحبك طريق من حقه هيلومك

جهلك ف علمه بشيء يجوز مع جهله بعلموك

دمه اذا سال من ايديه بيان على هدومك

واللي يبيع سكة مسير لازم يكون خاين

المشهد ٤: أثر الفراشة " ماسيكونُ كان "

تخيل لو انت رميت غطا ازازة ف الشارع ، الغطا ده
هتدخل جواه غملة ، عامل النضافة هياخد الغطا ف
الكيس ، النملة دي هتخرج من الكيس تقرص بني ادم ،
يورم ذراعه مايعرفش ايه السبب ، يروح المستشفى يسأل ،
يعمل حادثة وهو في الطريق! يموت . تخيل ! من غطا ازازة
رميتها ف وسط اليوم الطويل

كل الحاجات اللي بنعملها من غير ماناخد بالناس و يترتب
عليها مستقبل ناس تانية عمرنا ما هنشوفهم ، الكتابة هنا
بتكون مُربكة والتفكير كمان لو خدك مش هتخلص من
المشي فيه ، عموماً كلنا أسباب ف تفاصيل مانعرفهاش

المشهد

منذرو الأنفاق

الموسيقى

مقطوعة " ملائي اسكندرية " ياسر عبد الرحمن

الإضاءة والديكور

ثابت

الحالة

جدة

وبقول لكم من عزلتي

عن حكمتي ف الشر قاصد خير

أو لمستي للطيبين ف محطة الدنيا

هل كنت قاصد كل ده؟!!

ما اقصدش اضلل شخص قال لي :

فين اتجاه شبرا؟

كان سهل جداً أقوله : أدخل شمال ف يمين

لو قتلته ادخل شمال ف يمين

ماكانش قابل بنت ماشية ف اتجاه حلوان

وبدون سبب

كان فجأة قاعد ف الصالون يشرب شاي

ويتكلم مع الوالد عن المعازيم

ما اقصدش شيء

ساعة ما قلت لبنت حبتي : كملي وحدك

كان عادي جداً أقول : لازم نكمل سوا

لو كنا كملنا . ،

ماكانتش دلوقتي بتضحك

ضحكة رجّت قاعة السيما

وايديها حاضنه ايديه بياكلوا فشار

ما اقصدش حاجة لما قُلت لشاب ف الندوة

بلاش الشعر مش شبيهك

لو قتلته كمل

ماكانش صار العازف الصاعد

ولا كنت هألمح صورة ليه ف مجلة مشهورة

ماكنتش أقصد أي شيء

مكن تقول ان اللي زي موجودين أسباب

علشان بشر تانية مايصدّهاش الباب

علشان مطر يقصد أراضي بتشتكي من بور فراقها

واحتراقها

علشان غنا الألدغ يوصل فكرة العاجزين عن التوصيل

فلو سمحتم

لو شفتوا موكب ف اتجاه الكعبة ماشي

وقفوه / وماتقتلوش الفيل

ماكانش يقصد صدقوني وماكنتش أقصد

بس حظي سندن مش فاهم نجحت ازاى

دلوقتي لازم تهتفولي كلكم

أشكروني ع اللي كونته بجهالة واستحالة

أشكروا المحولجي ع اللمسة اللي
 عدلت سير حياتكم للجميل
 ردوا الجميل ف الأغنيات
 قولوا ف خيالكم :
 نشكرك يا أيها السر الغريب
 سموني خضر ف سر كم . . آه
 سموني خضر
 أو نجم لامع دل تايه ع الطريق
 فارتاح على الشاطئ
 وكون ذكريات محتاجلها
 يومها افتكر ان اللي دله النجم ف اتبسّم
 و بخط أوسع م الزمن دون علي الياطرة الخشب
 " اسمي مكان "

أنا شخص واحد من كثير
يغيروا بالأحداث بدون ما يحسوا بجميلهم
بمسحوا الدمعات بمنديلهم
ويمشوا رغم الوصل تايهين ف الميدان

لو تهت منكم هتلاقوني ف أغنياتكم
عند واحدة بتبتسم بفشارف ايدها
عند عازف ترنيمات الفرحة بتزيده يزيدها

عند واحد كل مرة يروح لشبرا
يلقى نفسه بدون ما يشعر
ف اتجاه حلوان .

خروج

هي الصدف بس الصدف جرحي القديم بان فيك
عمرك ماترضى بالقدر حتى ان زمان بنا فيك
من غير نظر شفتك حزين من غير ما ابص انا فيك

يمكن يكون دربك جنوب وتعيش بقلب شمال
وسكة تلمح فيها قبح قد بتنتهي بجمال
خانك نصيبك ف الرؤى واتهز فيك وجه مال
مش معنى اني اعترفت بيا لابد أكون بانفيك

{هامش}

كل اللي جاي قد كاه
مكتوب بقاله زمان
. حاصل زمانه ف مكانه يدنا ناله كام!
. يدكوا ذكرى وأهل أو حمم ضيعتوه
كل البشم ماريونيت وف الطريق العام
"ناس لما مشيت غلط قابلوا غريب حيوه"
الخط رد بارات والصدفة حلوة وخام
ارتبطوا ساعة قدر / سموا ابنهم " Dejavu "

الخدعة عايزة النظر، لكه توخي الحذر
المشعر الداخلي مش حلو كما براه
فيه حاجات اذا شوقتها بعينك تقول الله
واه غصت فيه عمقها
تطلع بصمت رهيب

أُنِشْتَايَك لَمْ يَكْ

غَيْرَ تَرَسَ فِ الْيَانَصِيبِ

وَالْعَدَسَةُ لَوْ قَرَّتْ

مَمْلُكُهُ نِيْشَاتُهَا يَخِيبُ

بَنَتِ التَّلَاتُ أَحْوَامَ وَقَفَتْ تَبِيعَ مَنَادِيلَ، كَاهُ وَقْتِهَا التَّكَسُّجِي جَوَه
الْإِشَارَةُ حَزِينِ، أَدْبَلَهُ عِلْبَةُ ابْتَسَمَ وَأَدَاهَا هُ جَنِينِ، جَرِيَتْ عَلَى
الْبِيَّاعِ عِلْشَاهُ تَشَوَّفَ فُتَّةً، أَخَذَ الْفُلُوسَ فُكَّهَا وَدَفَعَهَا وَسَطَ إِيجَارِ،
وَالْحَاجَّ صَاحِبَ الْبَيْتِ أَدَاهَا لِلزَّيَالِ، مَسَّكَ الْفُلُوسَ وَافْتَكَرَ قَامَ حَاسِبِ
النَّجَارِ، وَأَخَذَهَا مِنْهُ صَاحِبُنَا نَسِيْعَهَا جَوَه قَمِيصِ، ابْنَهُ لِقَاهَا طَمَحَ
ضَيْعَهَا فِي الْآتُونِيْسِ، وَلِقَاهَا شَيْخَ أَزْهَرِي فِي دَفْعِهَا لِلْكَمَسَرِي،
وَالْكَمَسَرِي لَهَا وَأَدَاهَا لِلْسَوَاقِ، كَاهُ غَاوِي شَرِبَ وَسَيَّكِرَ وَدَفَعَهَا عِ
الْبَيْبَرَةِ، وَالصَّبِيحَ صَاحِبَ الْبَارِ أَدَاهَا لِلْجَرَسُونِ، جَابَ بِبَيْعِهَا جَبْنَهُ
وَعَيْشَهُ وَتَرَكَهَا لِلْبِقَالِ، وَدَفَعَهَا لِلْمَنْدُوبِ فَاذَاهَا لِمَرَاتِهِ، وَمَرَاتِهِ
لِحِمَاتِهِ وَحِمَاتِهِ لِلْسَبَاكِ، رَاجَعَ فِي آخِرِ الْيَوْمِ تَعْبَاهُ رَكِبَ تَاكْسِي، فِي
أَدَالِهِ خَمْسَةُ جَنِينِهِ كَانَتْ بَتَاغَتُهُ زَمَانُ

أَدِي فِيلِمُ مِنْهُ عُمْلَةٌ. أَيْشَةُ حَالُ بَقَا الْإِنْسَانِ!!

لو كان أبوك ماشريش سيجارة في سيجارة
مكاش مات ربما ولا صاحب السرطان
وان كنت جيت من الحجاز وركبت حبة
كان ابنك اللي اتولد له يأتي حتى الان
لكه مافيش للقدور في ايدينا ستارة
وعشان كده له يلك إلا اللي فعلاً كان

لو رجلي اتكسرت شيء عادي

ممكن اركب " ساق صناعية"

لكن لو روحي اللي اتكسرت

مالهاش أي حلول طبية

انا اسف لسيجارة رميتها

من قبل ماتلفظ أنفاسها

اسف لهدوم جاية مقاسي

بس انا مش جاي على مقاسها

أنا اسف للضحكة بشدة

على حزن مع الوقت حبسها

اسف جداً لبواقى الذات

وحاجات بتجرف ديلها حاجات

زرعوني تاريخ . . حصدوني تاريخ

عصروني حنين . . نزلت بنات

جدي ماشفتوش بس باحبه
عمي قابله ياريتني ماشفتوش
كل اللي بقيته بدون مجهود
ضاع مني بجهد حاجات مابقوش
أنا بهري ف ايه
ده كلام فارغ!!
- هما بيقرؤك
- بكره يملّوا

خدوا شعري قصاد حد بميل له
وادوني السهرة الصباحي
وصحاب الحارة، ونصبة شاي
ادوني البنت اللي عاوزها
وانا هاديكم سر كتابتي
واديكوا كمان كل ماحيلتي
كل اللي انتم شايفينه نعيم

كونوا نفوسكم

وبلاش تزيف

الدنيا ميزان

والجرح خفيف

والحزن ميدان

والصبر وليف

كونوا نفوسكم

مش ناس تانيين

واشتموا ببجاجة ف وقت الضيق

واشربوا بيرة ف شهر ديسمبر

واسمعوا مزيكا بصوت عالي

واحضنوا ف الشارع مش ف الضل

واقفوا عرايا ف حضن المرات

واتمنوا حاجات . . وماتعملوهاش

وابعدوا دائماً عن أي فلاش

اطلقوا ضحكتكوا

ما تمسكوهاش

وبلاش تهتموا بمنظر كم

وقعوا كشري على هدومكوا الشيك

اللبس بدقة بيبقى أنيق

قولوا ف سهراتكم ألش رخيص

واشبطوا ف حديد اخر الاتوبيس

روحوا السينمات مع كل خميس

واخرجوا م السيما بشكل جديد

واهتموا بشيء غير شكل ولبس

الروح كما قلت " ان انكسرت "

مش ممكن ترجع روح بالجبس!

وبقول لكم :

كانوا جماعة من بنات بيغنوا أناشيدهم

وبيبدأوا بروفة لحفل السبت

كان مصري واحد بس ف الفندق

بيراقد الأصوات بحرص وينطلق فيها

كانت ساعتها بتبتدي تقرب

وببتدي ف الشك

قالت :

لو تحب تكون لوحذك / كون لوحذك

بس مركبنا تساع واحد كمان من غير ماتغرق

لو تحب تضيف على الأهازيج ملاحك

إحنا أولى .

هل بإيد واحد لوحده إنه يرفض بنت من تونس

قلت حاضر

كان صحيح الليل مؤقت

والغنا للفجر أقصر م النفس

بس فعلاً للموسيقى ليل بحجم الأرض والذكرى

اللغات ف اللحن واحدة

" بارشا " عندي أو " كتير " عند الجميلة التونسية

مش هتفرق

مؤمنين بالواحد الإنسان وبالنسيان

وبيناع الأقل

وابتديت الحكى عن نفسي

عن بلادي اللي ارتضت بالعشق والفيضان

ورمتني مجهول الهوية للشواطىء

عن غُنايا الخاص ف وصف الناس

غنيت يومها أغنيات السمسمة فانتشوا

واتحركوا بالأغنيات التونسية

واتلامسنا

زي ضل فراشة مايلامس رحيق الورد

وانطلق صوتنا النشاز المنتظم

يحرق خشب من أغنيات البرد

كلمتني عن ولد خد منها مفتاح أوضتها واختفي

عن أم ربة بيت بسيطة

جاهلة يمكن

بس أستاذة ف فنون المزرعة والحرث

قالت :

صدرها كوكب حكاوي لو طلبت النوم

أو خدة للدموع لو تهت من نفسي

صوتها أوسع من نهار أول نوفمبر

لما غنت للجبل

غناها واستسلم

واما غيتلي

ابتديت العزف زي النزف

وبقيننا دون مانحس شركا ف كل شيء

ف الشاي

وف الأحلام

وف الغنوة

تتقابل اللهجات هنا ف القلب

تتحرر اللكنات من الإعتماد وتصبح لنا حرة

كانت ف ايدها تذكرة سبعة صباحاً

وف ايديها الثانية قلب نحاس

وكإني مفطوم ع الفراق والبعد

كل قلبي ما يحفظ الأسماء ثلاثي

يبتعد عنها

كانت صديقتي تشبه البارفان وتشبهني

ضمتني جداً وبدأت ف البكا

قلت : البكا يخلص المشهد حزين

ممكن ف يوم شتوي نعود تاني

نبتسم ف الفيلم

ونعيط على الكوبري

نغني بلهجة واحدة

وننقسم مع بعض باستمتاع

والقلب يوهب للغنا صك البداية واللقا

وكإنه م الحزن اكتفى

لياً أول لمسة منها / حضنها

وليها ركن النار وأسباب الدفا

اللي واثق منه فعلاً
اني مش عابر مؤقت
أو مجرد
حد خد مفتاح أوضتها واختفى .

خروج آخر ضروري

بالروح مفارق ومش فارق هاعاود أو هاروح
سايب فراغ مالي المكان أجسام ثقيلة ناقصها روح
سايب خُطايا الناقصة خطو ودهشتي وسط الصروح

من غير رفاق يارحلتني عتمة ماليكي أمان
وزهقت من كرسي التراث وانا بافتكر ف زمان
هرب الزمن مني وضاق بيّا المكان

ومش هاقول ف الوقت ده ياروح مابعدك روح

ملحوظة:

الحكاية باختصار
بنت أطيب م النهار
ايد تغمي عنيك بخفة
وانت بتدوق الفطار
أم تعرف تبقى طفلة
طفلة تعرف تبقى دار
الحكاية عن عنيتها
سيما صيفي وليل سكات
الحكاية عن خدودها
ورد نبّت غمازات
بنت مكتوب ف بطاقتها
انها كوكب بنات
والصراحة قلبي دايب
يوم بشدّ وعشرة سايب
انتي حزن لشخص غايب
انتي دستة بالونات

أما بخصوص الخناق
واننا ف عدم اتفاق
وان بيننا حرب أطول
م اللي دايرة ف العراق
ده جمال الحب فعلاً
لعنة الحب بغباء
وابتلاء الغيرة واجب
دائماً الغيرة ابتلاء
وانتي ممكن اغير عليك
من دفا وشهم ف ايديكي
من عنيكى لو تغمض
ثم فجأة تشوف عنيكى
من حاجاتك، بارفاناتك
من هدموم علي شماعاتك
من كلامك من سكاتك
من صحاب ماليين حياتك
ف الطبيعى نكون تملي في اختلاف
والطبيعى ف كل شهر يومين عجاف
والطبيعى لانك انتي الكون بحاله
اني اشوفك عكس كل الكون ماشاف

ف الختام

فيه كلام محتاج اقوله بس مش لاقى الكلام
فيه حاجات محتاج اقولها وانتى عارفة انى خيبة
وانى بتلخبط ف اسمي
وانى باعرق لما افكر
وانتى عارفة ان انتى سكر
وانى من غيرك وحيد
وانى صايم طول حياتى
فجأة شوفتك جاية عيد
وانى مش عارف اعبر
أو ابين شىء جديد
أو أقولك يعنى مثلاً
انتى نجمة فوق بعيد

فاعذرينى، واحضنينى حضن كافى
حطى ايدك فوق كتافى
وارقصى حتى ف خيالك
تنزل المطرة اللي ساكنة ف غيم جمالك
واعذرينى لو ف نفسك كلمة عمري ما قولت هالك
واعرفى انى بحبك
وانى جنبك للنهاية
هى دي كل الحكاية.

باكتب لكم

عن جاري بيع الهدايا والتحف

لما انصرف للموت وساب مدد ومساحة للتأويل

(مات من السرطان)

قالوا الجيران واستشهدوا بروشته الدكتور

فصرخت فيهم: لأ ، مماتش م السرطان .

كان فيه سبب أقوى

سبب يجبر عجوز ع الغياب

ويشد قلبي للبكا

وازاي يعيش والبيت كئيب مخنوق وسَعْ

جدرانه بردانه احتراف عزلة

وكل الأماكن فيه

بتطلّع التواريخ

بنته

قبل ماتسافر بلاد حرّانه تلج

سابت خيوط الذكريات ف البيت

كعنكبوت يبيغيب الكرانيش عن الرؤية

تفاصيل سابتها البنت مش قاصدة

مثلاً:

فستان حرير أبيض

كانت تبان جواه كبدر ف ليل تمام

بارفان مثير

ماكياج من النوع البسيط

وعروسه باربي

كانت بتحكي معاها ع الواد النبيل

اللي شافها ف المسابقة وابتسم ثم انقسم

جائز ساعتها قال لها :

هتسيبي حضني لمن

فانخرطوا ف جنينة بُكا واستسلموا

دلوقتي

أربع صور ف الجامعة واتنين ف ابتدائي

مايعوضوش طيفها

مايعوضوش دخلتها ف المطبخ عليه

ومعاها شوكلاته

وكأي واحد زيّ مر بالسبعين

ماكانش يقدر ع الفراق

قال لي :

ف السن ده بالذات

كل الآباء أبناء

كل الكبار أطفال

يتشعلقوا ف مراجيح من الذكرى

يهتموا بالتفاصيل

وما يطلبوش تأويل

بيسيوا للخبرة التوصل للنهاية

ويعيشوا ع اللحظة

سافرت

مافضلش منها

غير فواتير الهدوم وشرايط الفيديو

وعجوز

ماقدرش يرجع بقلبه م المطار فانهار

فرط حنين قبل الفراق مايكون

ف اتجمعوا الناس اللي شبهه

وشافوه بيرحل ف اتجاه أبيض

وملاحه بتخاصم جنون الشمس والرمان

صرخت فيهم : مات من الفرقة

والله م الفرقة

ماماتش م السرطان

..

..

..

..

..

..

..

..

..

{هامش}

ألف رحمة ونور عليه
مشة هتفرق اسمه ايه
مشة هتفرق ابيه ميه
كان رفيع / كان نخيه
كان بيضحك.. كان حزيه
كان حرامي أو أميه
كان قصير أو طويل
كان بينسي أو أصيل
يبقى عامل ولا عالم
أو مشاغب أو مسالم
أو مناهض أو موالي
المؤهل والطي / عالي
لبسه خيشة أو لبسه غالي
معهما يبقى ميه وايه
ألف رحمة ونور عليه.

نشيد للغياب

وياما الخليج خد بشر من عيالهم
عيال كان أملهم
يخسوا بمعاني الأبوة وجمالها
يخافوا اذا الساعة عدت حداثر
ويستنوا ياخدوا ف حضنه العيية
ف مين اللي قال الهروب مسئولية!
ومين اللي قال ان لم الدراهم
هيجعل ولادك يخسوا بأمان
انا اعرف غلابة وعمال نضافة
عرقهم بيملى الزمان والمكان
وكل الفلوس ف البنوك والاراضي
ماتسواش وجودهم ف لمة فطار
سلام للي عيط وساب قلبه واقف
بيستني ابوه عند باب المطار
لكن برضه عيب اني اليوم اللي سافروا
وتعبوا وعافروا
وامنوا بوطنهم لحد اما كفروا
أكيد هما يعني قلوبهم بتبكي
مافيش حد عاقل بيتمنى غربة!
لكن لو بلدهم بتقتل بقسوة

فلازم هيمشوا مادام هي تربة
يصونوا اللي فاضل ف بكره لعيالهم
ياكل اللي ناضلوا وشدوا رجالهم
ورهنوا حياتهم مقابل مدارس
واكل وملابس
وتمن المكيف
وحق المصايف بدم المصيف
واسرة سعيدة
قريبة وبعيدة
يقابلوا ولادهم ف شركة صرافة
ويمشوا معاهم لحد الأرافة
يصلوا عليهم
ف كام متر رملة...
وهل ده اسمه أمله اني اموت قبل ما احيا!
وهل فيه ف مشاعرك حاجات لسه صاحية
باعيط وباضحك
بالوم بس باعذر
بلادي التي كل يوم فيها موت
بتكتملي صوتي بحق اني عايش
بابوش لما بافضل واكون بره بابيش
اجيب حق موتي وحق الغوايش
وتسمحلي اشوف العيال ف الاجازة!

وهل ده وطن يبقي ليه أي عازة؟

بلاد فيها عالم ف عنق الازارة

ياتطلع ف غربة ياتفضل تموت

ياغربة حزينة بتشبه مدينة

بتبني الضغينة

وتمحي البيوت

بأكّد لذلك..

بإن السكن في نواحي الزمالك

وإن اشتراك النوادي الكبيرة

وفكرة وجود الجراج ف العمارة

لايكن يساوي الوقوف ف السفارة!

وأكد بإن الهدوم وسط ناسك

تمنها يزيد عن وقوفك ف " زارا "

تنقي بسنين اللي غابوا وسابوك

جواكت تمنها مشاعر ابوك

وجذمة تساوي مرتب سكاته

ووجعه لانه مشافش اللي ماتوا

وحزنه ف بلاد الوجد والاهانة

يارب اللي سافروا

إيدك معنا

يعودوا لبلادهم

ويبقوا السند والوسيلة لولادهم

وتستتر فؤادهم
ماحدث يشوف المصيبة ف مسافر
وتجعل طريق المطار عودة بس
يارب اللي عيط وفكّر وحس
ورب البلاد اللي خانها الضجيج
تخلي البلد دي لأهل البلد دي
وتجعل بلاد الخليج للخليج.

واكتب لكم عن حبها " كان لا بد أحبها "
علشان كده دوناً عن الألف اللي حضروا حفلها
انا الوحيد اللي خبطت ف كتفها

هي

تلات أمتار من البهجة
خمس أشبار من المرح الطفولي والندا
تقدر تقول مصر الجديدة
قبل ماجهاز المدينة
يجبر الشارع علي استقبال مزيد م الاعلانات
والاعلانات علي قد ما بتكبر
بيزدادوا الضحايا ف المدن
حسب اتساع الاعلانات
او ربما

حسب اتساع صدر الأهالي ف المدن

لا أعتقد اني بعيط غير هنا
في ركن ضلمة ف مسرح الأوبرا
ف المكان اللي اتولد حلمي البسيط جواه
حلم انه ينزاح الستار عني
فاغني

لا أنانية إذن
النص ده للبت دي
أما انا فمجرد الراوي اللي يعرف شكلها
بارفانها لما بين صفين ف مسرحها
حق الفراغ لما تعدي بيملي مطرحها
وحاجات كتير تانية
الشعر مش دوره يوضحها

رقصة عشان امي

ست الجهات الاربعة

والرحلة بالكامل

رقصة عشانني ياصبية

علميني القاهرة من ثاني

أرجوكي

ماعرفش غير القاهرة القاسية العنيدة

كنت كل ما احب افارق

اجي افارق من هنا

وارجع واقابل من هناك

واجي افارق من هنا

وارجع واقابل

وكانها بتوصل الشوق بالقنابل

وكانها رافضة السنابل

والليلا دي

كل شيء بيغني ليكي

انتى وحدك ف المكانة المعلنة ف القلب

الجهر باده من هنا واللى وافر

ف بلدنا ع الساحل بلاقي ميت سبب يجعلني ما اسافرش

ف القاهرة مليون سبب

يجعلني اسافر

انا بروحك يا صبية بقول لهم

اللي يحرم رقصة العاشق لروحه

يبقي كافر

مين أنا

غير انتى لما بتنحني بجسمك فيخضر المكان

مين أنا

إلاكي وانتى بتمنحي الجمهور مشاهدة مستحيلة

ف الكالوس كنتي

وكانت رعدة بينة من عينيكي

اللي زاح عنك ستارة اغنياتك كان أنا

أنا اللي زقيتك بايدي للحضور

فمليتي روح الأرض نور

ورقصتي للعالم

يا أيها القادم من المدن البعيدة ع الطريق الساحلي

بلاش تروح الأوبرا ف ديسمبر

بلاش تمر بسرعة ف الصف الأمامي

خلف واحد تاني مر

لأنك لو حاولت بخفة تتفادي التصادم

هتخبط فيك ساعتها

وبرضه هتجربها

هتجربها لامفر

الرقصة دي

بدأت من خمستاشر سنة

عيل سبع سنوات ف ايدين ابوه

والقاهرة بالنسبة ليه

يمكن مجرد حلم شافه

بعد فيلم قديم عن الموت ف اتجاه القاهرة

والقاهرة بالنسبة ليه

سبع أعمام ماعرفش عنهم أي شيء

غير انهم عزّوه ف ابوه اخر ديسمبر

واحنوا يملوا كتافه بالدموع

ويعدوا تذكرة الرجوع

العالم الثالث أنا

أنا البؤج اللي فضت نفسها علي سكة القطر القديم

واستنتت الراجع من الغربه ماجاش

لان تذكرة الرجوع عمر البشر

ولإن تذكرة الذهاب ببلاش

لافايدة من هذا العبث

لافايدة خالص م المحاوله

فانتي أولى

وارقصي

يا ايها العالم

وهي بترقص البنت انتصار للناس

أنا والغريب واحد

وهي بترمي طرحتها لفرحتها

انا والغريب واحد

يا أيها العالم

تعبساً لأرض العالم الثالث وهو بيكتفي بالدور

وبينتهي بردان

تعبساً لصدور يينفتح للنار وينتظر يوم القيامة

ارقصي يابنت ، يا ضل قلبي الليلة ع المسرح

وموتي بعدها ممكن ، بس اتركي للناس علامة

هتفضل أرض العالم الثالث كأرض العالم الثالث

طول ما الصدور مفتوحة للنار بابتسام

وبنتظر برداً سلاماً

فارقصي .

للمطر

ما للمطر من حق

وانتي أول مطرة يشهدها التاريخ

(هو صديح العوى غلاب ، ما عرفش انا ، والعجبر قالوا مبرار

وعذاب ، واليوم بسنة؟)

ما للأغاني للأغاني

وانتي لحظة رقص صافية

أمهاتنا علمتنا

لما ترقص بنت اجمل من تاريخ القاهرة

لازم برهبة نخرمها

حقها ف الرقص

حقها ف الكتابة

لما وقعت بوابات القاهرة

كان السبب بنوتة رقصت

والحضور ما منحش رقصتها احترام

وده ف شرع الانسانية يا اصدقائي حرام

مين أنا

علشان فتاة من أرقى احياء المدينة ترمي ف حضني!

وانا اللي كان قمة طموحي

افوت وراها اشم بارفانها واخرج بألوانها

كإن حتم السما وقعت ف ايدي

بس لما الصورة تتغير ف لحظة

وتسيبي ع الأرضية ورقة ملونة

فيها أرقامك واحلامك وعنوان الإقامة

فالسما بالشكل ده زادت كرمها

وما فيش قصادي الا شكري واحترامها

(جاتا الهوى لله غير هوا عيى ، وكل هدى حلاوته نزيه)

كان صوت هدوء القاعة

أعلى من كاسيت أتوبيس بيحمل طلبة للنزهة

و كنت وحدي ف المكان

كأنني وحدي

لإن ألف زيادة غيري كانوا موجودين

وكل واحد منهم بيظن نفسه كان لوحده ف المكان

بس اكتشف ان المكان كان فيه زيادة

ألف غيره موجودين

العالم بيتكرر إذن . . . احنا اللي مش ثابتين

الضوء اللي انطفي ماكانش توزيع للإضاءة

كان احترام ليها

والديكور اللي اختفي كان احترام ليها

الطفل اللي عيط ف الصفوف الجانبية

كان بيبكي مش عشان محتاج طعام

او لإن صباعه ف الكرسي انتنى

لكن لأنه ف لحظة ماشافها

عاتب الرب

بكل مافي الطفل من صفو وبراءة

ليه ماجاش للدنيا من عشرين سنة

يمكن ساعتها

كان هيملك ويا هذي البنت آخر حكاية

ويجوز هيحكيها

ياأصدقائي

عشر ثواني دلوقتي من حقكم

كل واحد منكم يفكر للست غنوة

وسراً يغنيها

غنوا:

باسمي القاهرة ف الفجر شادية

واسميتها الصباح انغام

واسميتها ام كلثوم ف المسا

من حق شاعر زبي مات مرات كثير يسمي الليل

كما يهوى يسمي الليل

من حق صاحبي مغرم الطبله يسمي الدنيا دوم ، أوتك

من حقنا نلرق فرادى ف بعضنا فنصير جماعة

من حق واحد حب هذي الدنيا طول العمر

دون مايميل

يرفض حبها ساعة

بنفس المنطلق وبحركة ثانية

صدقت اللي قالوا من صحابي

اني بنسى ابقي الدغ

كل مااطلع ف الإذاعة

(بمني قلبي بالأفراح ، وأجمع وقلبي كله جراح ، جراح ، جراح)

الغريبة ان كل الناس هنا حبوكي مش قاصدين

كلهم حبوكي يا حلوة

كلهم

أعمي هامر ما بين الوف الفاتنات وهاعرف مطرحك

من وسطهم

بالريجة يومها هاعرفك

بالنسمة لما تفوت ف قلبي تملأ أركانها

باللمسه لما تشيل عن كفي احزانه

بطعم اسكندرية

اول الأشياء دخولاً صدري من عشرين سنة

مازلت انا

وانتي تملي مازلتني

امي انا . . . انتي

اخي واخويا وذكرياتى وبنتى
الرقصه دي خلطت ما بين جسدن هنا
وانا بأسألك ، مين اللي مال ف الرقصة دي
انا اللي ميلت ولا انتي اللي ميلتي

قاهرية اذن

اللي تسبيك تقرا بارفانها
قبل اما تقرا ورقة باسمها ومكان اقامتها
قاهرية اذن

اللي تاخذك وانت داخل اخرك
وكانها أنثى بتعملك عيل ف دنيتها
لا ارى غيرها ولسه لا أرى
وبقول لكم بهدوء فلا تعلنوها
أيوة حبيتها

(انا ياترى اهو ده اللي جرى وانا وانا ما عرفش ، ما عرفش انا).

لسه برضه زي ما انتي
أربع سنين مايغيروش زيك
مايغيروش ضحكة عنيكي الطيبة للناس
وهدوئك العاصف علي الطرقات
أربع سنين
مايدلوش ذوقك
شكل اختيارك للهدوم والعطر
تسرحة الشعر اللي لفتت نظري أول يوم
بس الغريبه اننا يوم ما افترقنا
كنا برضه ع المحطه
تفتكري
إيه العلاقة بين لقانا والمحطة؟

طفلين مايعرفوناش
بصولنا وابتسموا
مد الولد إيداه واداني عسلية
والبنت مدت إيديها بواحدة عشانك
هل هو ده سكر لقانا الاخير
وليه منير
غناً بهدوء ف الوقت ده
"لو كان لزاماً علينا الرحيل كارهك ياوداع
ولا بديل"؟!

باقولك ايه
 ماتيجي نكسر حد هذا الصمت
 انا ببساطه
 هاعزمك ع الشاي
 وانتى ببساطة تقبلي
 أربع سنين
 مايوصلوش عاشقه لرفض الشاي
 ومايخرموش عاشق من اللحظة
 خلىنا نتكلم كلام تاني
 مش هاقولك كنتي فين
 ولا ليه البعد ده
 مش هابص بغيره ع الدبلة
 ولا اسأل عن صاحبها
 جايز يكون عالم
 ولا عامل
 أو سياسي /
 فنان مريض باللقطة والفكرة
 بيكّب نص اليوم علي القهوة
 ويكّب نص القهوة ف هدومه
 أو يكون عازف أجير
 بيقدم اللحن لسكاري مستحيل هيشوفوا فيه موتزارت

أو يكون شاعر خبير
يقدر يخط الوردة ف الخصلة ببراعة
ويخط مايكفي من الشهرة
مش هتفرق

انتي كمان ماتركزيش على حز في صباغي الشمال
ماتسألش عن أول الزوات وآخرها
عن شكلها / لون شعرها
تفاصيل كتيرة عن مكانها ف الخريطة

انتي بالنسبالي حرة
تشربي القهوة بزيادة ولا سادة
يمسك الفنجان يمينك أو شمالك
اللي يفرق وقت هنقضيه بعيد
نستعيد الذكرى فينا ونستعيد
نطلب اللحن اللي بنحبه ونرقص
تلت ساعة /

قبل ماينادي المنادي ف المحطة
عن معاد قطرين شمال وجنوب

اللي عايزه
ان لو واحد جرح ف اللحظة دي
التاني يرفض يجرحه

كلها شوية ونرحل عن هنا
واللي قمل جرح سابق
مش هيقدر يفتحه

فكرة حقوقنا ف بعض ماتت والدليل
لو نقط الفنجان دلوقتي ع الجيبه
مش هاعرف اعمل بامسحه

{هامش}

بخصوص أمي

- عاوزة أفرح بيلك
- لما أفرح بيلك انتي الأول
- اتلم ياواد بتكلم جد
- انا عاوزة اتطمع ليك وعليك
- والنبي فلك
- والله عبيط
- انا يابني هاروح مش هاقعدك
- محتاجة اشوفك ساكن بيت
- هو انا يعني بنام ف الشارع؟
- يا حمار ادبني عقاد نافع
- مش هتجوز انا كده مرنح
- أنا أمي كمنجة وحضه مرنح
- ومشاعر معرفتش احكيها
- أنا متجوز أمي أساساً

منظمه وانا عايشه بيها

أنا كل ما بهرب منها واغيب

بكتشف إه انا بهرب فيها

الست دي حالة ماتكدرش

تغير..... هي ماتتغيرش

الدنيا تشيلها وتهبها

تطلع تنزل

تسبها تقوم

أنا أمي أنوته بـ ١٠٠ راجل

ورجولة بدرجة ناي مكتوم

ساحة ماتوفي أبويا وراح

شوقت ف نظرتها كلام وجراح

من يومها وهي عمود البيت

والأمه دائماً / والناهي

- الدوا جيبته؟

- فكراني نسيت؟؟

- انا عارفه ان الدنيا تلاهي

احضننها تقوللي امشي ياتصاب

بتغيب أيام زي الاغراب

وتقوللي مشاغل وأبصر ايه

- انا أصلي بقيت شاعر معروف

- قالك معروف.. بأمانة إيه

كوافيلك تشهد يامهنأ

ف بضائي يأمرة أنا بتلرق

واخرج على أومنتي شوية وانام

واسمعهها تصلي وتدعيلي:

- الواد تلفاه، انما طيب

وانت قريب

ارزقه رزق بحجم السماوات

وارزقه بالخلفة ولاد وبنات

وتنام وتقوم تلاقيني مشيت

فتقوم تبدأ ترويق ف البيت

أنا اسف جداً يا حبيبتي

علي سفرني الدايم والاشغال

علي كل كلام ضايقتك واتقال
انا مهمما بدور وباحيشت في الدور
باطلع وانزل واجي عليك
أنا راجل جداً

ورجولتي تلخيصها في بوسة علي ايديكي
والدنيا اه ضاقت في انتي براح
وانا جنبك باتطمه وارتاح
وخناقنا ساحات بيكون راحة
وخصامنا كثير بيكون تملكك
الأم مكانه لسكون الروح
وخضار من قلبك طارح فيك
- أيوه يا ماها؟
- عاوزة أفرح بيك.

{هامش}

القهوة،

منه لئلا الكتابة عنها / باخت
فيه حاجات زيادة مدحها لعنة
يارب هبنا قهوة تشبه حزننا
واوهبنا شخص أصم يسمعنا
وادينا قلب نبوحله ما يخوننا الله
وادينا حضه نروحله، فيساعنا"

صديق شوارع ذكريات تايهيه

والخز شاعر له هدوءه وحكمته

سألوا الكمان ياهل ترى بتحب ميه؟

صفاق - الملكاه - ما فضلش غيرها في رثته

اتنبيه في حرب وخرجوا الاتنبيه مقتوليه

وحضنها هربت منه، رجعت حضنته!

ميه اللي سَلَّمْ للشَّتا المِفْتَاح
 طعم الحاجات الدافية في الليل والمطر
 تُهدِّق في كل الهريانيه ميه جَنَّتْكَ
 البنت كانت حَبَّتْكَ يا حبيب
 حَبَّتْهَا ليه ساحة ما كانت كرهتْكَ؟!
 وازاي بتعمل ميه سجايك بالونات
 بتسيبها تطلع للسما دخان
 البنت مشيت وانت مَتَّ عشاها
 دَحِنتْ نفسك في الصباح سطران
 وعطشت ميه شرب السما في البحر
 والبحر ميه كثر الغرق عطشاها
 فبلاش تفكر كل ماء يرويك
 وبلاش تفكر كل حصه شاريك
 فُكِّرتْ يومياً في كل الناس
 ونسيت تفكر في اللي فُكِّرَ فيك
 في الليل مساحة اسمها "الأشيف"
 كل الاغاني والصور والذكريات

كل الحاجات بتطل من ذكرى الحاجات

ف الليل وكل المراتحيه نايميه

هتتم جنبك لحظة تسوى ساحات

أنا تكفي مملكه تلمسه يشوق غياب

أنا قلبي مملكه تعصره ينزل بنات

لكه لسوء الحظ أو حسنه

ماقتش عارف أنسى دي بالذات

وكانها كوردان " عمر خيرت "

ريحة الشوارع وقت فجرية

كل البنات هي وهي البنات كلهم

وانت اللي بتروحلهم مايطلعوش هي!

طب ايه يا عم الشنا؟؟؟؟

أنا تحت عيني اتهمى من كتر ماحتيت

فكتر فيها ضحكك.. ضحكك فجأة بليت

ليه الشوارع كلهم قاصديه

يفكروني باللي مش فاضليه؟

والقهوة كرسى الاعتراف بالذنب

تَشْرَبُ تقول كل اللي سَابَكْ مِيه
ليه الشتا والبحر آتِيه صَحَابْ أُتِيه
طَبْ لِيه ف كل البلكونات حكايات
فَتَحْت عَيْنِي جَرِي خَمَضْ مَات
وَكَبَرْت بِيْتِنَا لَمْ عَفْشَه وَهَجْ
والذي ماحاجش بس شوقته " يا حاح "
وايديه ف خري ختم نسر كبير
أُمِّي اللي شيلت ف حضنها جناحات
وبقيت ف طيبة كل حضه باطير
وصحابي دفتر خدت صفيحة ف مطلع
منهم ثلاثة " توأميه وضمير "
شكراً لإله الشتا / حرّانا مافضحناش
شكراً لإله الذكريات همامتش
أكبر دليل عندك أنا
أنا لسه اهو مانستش
شكراً ل بلة طيبه ف ديل التوب
شكراً لمهرة تَبَلْنَا نَنَشَفْ

تَعْرِفُ يَاحْمِ الشِّتَا وَلَا بِلَاشِ تَعْرِفُ
فِي مِثْلِ هَذَا الْوَقْتِ فِ كُلِّ حَامٍ بِيَفُوتِ
بَاحِيَا وَامُوتِ مَرَاتِ وَفِ كُلِّ مَا أَحْيَا بِامُوتِ
وَعَمَلَتْ مِثْلَكَ ذِكْرِيَاتِ وَخَنِيهِ
وَالْقَهْوَةُ سَادَةٌ وَوَشْعُهَا مَظْبُوطِ
وَعَمَلَتْ عَالَمٍ مَعِ خِيَالِ أَلْوَانِ
وَعَمَلَتْ صُورَةً بِأَلْفِ حَسِّ وَصَوْتِ
وَفَتَحَتْ صَدْرِي لِلْغِيَابِ شَبَابِيكَ
دَخَلَ الْحَمَامُ عَشَشَتْ وَصَارِلَهُ بِيُوتِ
لَا الْبِنْتُ رَاجِعَةٌ وَلَا الْكَلَامُ يَلْقِيكَ
وَلَا تَنْحَلِكِي بِأَكْبِي وَلَا الْعِيَاظُ مَبْسُوطِ.

ل داوود عبد السيد عن فيلم " رسايل البحر " ، للدخان
بصفته وشخصه ، ولآسر ياسين وبسمة ومحمد لطفي مع
حفظ الأدوار ، لـ cilantro جامعة الدول ، ولموسيقى
ياسر عبد الرحمن باعتبارها نصوص شعرية

باكتب لكم

عن بيت قديم مادخلتهوش

ماعرفش مين ساكن هنا؟

سنوات بافوت

بالمح خيوط العنكبوت بتحاوط الأركان بخفه وانتصار

ماعرفش مين ساكن هنا؟

لكن طيور كانت بتهرب من عشوشها

لحد عنده وتنطلق

يشرق نهار

بيطير حمام من فوق سطوح البيت

ويطلع للسما

ينزل بسرعه حمام جديد بدل اللي طار

ماعرفش مين ساكن هنا؟

يمكن عجوزة بتعبر التمانين

وتحكي بلطف للأحفاد

حكاوي السندباد

يمكن محارب طار دراعه ف عز وهج الحرب

فاستسلم بسرعة للنیشان والموت

يمكن غفير

وصوه صحاب البيت يتابعه ف وقت مايهاجروا

أو يمكن مجرد بيت قديم على ناصية أجمل من لقا البحرين

وحب اتنين

يمكن؟

ما عرفش مين ساكن هنا؟

بس الحقيقة كل شيء بيحبيني يوماً هنا

كل شيء

صوت الكناريا وهي بتقيم المراسم كل حين

وبتدهن البيت بالغنا واللحن والموال

شكل الشجر لحظة ما يخلع ف المساخر قميص / زي

العريس

بلكونة بالحنية دي

لازم تكون قامت عليها قصة الحب الأخيرة

لازم يكون عيل مصاب بالحب قرب من هنا

شبك ايديه فوق الغصون علشان يوسها فانتنى واختل

روح مصاب بالحب وبكسر الدراع

لكنه زاد شوقاً

وعمره مائل

بارتاح هنا ماعرفش ليه

وكإني قاعد في الخلا مع كوخ قديم

موجوع يا هذا البيت أظن

وللأسف

كل اللي وجعه داخلي ببيان سليم

كل اللي عدوا من هنا عدوا

ولا هدوا

ماشافوش ملامحك زي عيني مابصتك

خايف /

كإنك طفل عايش ف الجنوب

بیمارس التحطیب لأول يوم وآخر روح

مبسوط /

كإنك قلب صیاد من بلدنا

لما يرجع ف المسا شایل هدوم العید برزق الإید

بردان /

كأن الفجر بيخطي بهدوء من تحت عقب الباب

ويلمس خدها

مكسوف /

عشان بتحبها

بصيت وخمنت ببصيرة وبعمى

مين اللي كان ساكن هنا؟!!

قالوا الجيران :

من يوم ماعزلنا لهنا مالمحنا شيء غير الطيور

كل اللي يمكن نعرفه

ان المكان شايل ف قلبه الذكريات لسنين

بيان حزين

وبيان بيضحك ف الصباح

قال حد منهم :

بس انا بلمح هنا عيل بيجري كل يوم

باسمع عيال بيعيطوا وبيهتفوا

انا الأول . . لأ أنا / أنا الأول . . أنا

والثاني قال :

اما انا باسمع هنا صوت الموسيقى كل يوم

يمكن موسيقي قديمة م القرن اللي فات

أو يمكن يكون صوت الستائر

بعد ماتقابل نسايم بحر هايج ف الخريف

والثالثة قالت :

ربما فضلّ صحاب البيت بعادهم عن هنا

أو فضلوا الموت البطيء

ما عرفش ليه كل الطرق بتؤدي م الشارع لحجر البيت

بكيت ، وكتبت بالطباشير علي الجدران

" كان في هنا أشخاص بتعلم زينا "

وكتبت برضه

" ملك مين ما عرفش؟

ملك شيخ؟ مومس؟ صبي؟

ملك مسلم؟ قبطي؟ يهودي؟

مش هتفرق

كل اللي عارفه ان هذا الجزء أصبح ملكنا "

ولمصلحة حبي الكبير للبيت

لمصلحة هذا الغرام الملتهب بيننا

أفضل كده ما عرفش

ما عرفش مين ساكن هنا .

باكتب لكم عنه

مرّت سنة

ولسه بييجي يوماً إلي المطعم

ينادي بسرعة ع الجرسون

ويطلب قهوتين سادة

يُص من الإزاع الشارع الخلفي

ويستناها تيجي بالساعات

زي اللي واقف على رصيف القطر مستني

والقطر فات .

زَعَق ف وش الحاضرين

لحظة ماتهموه بالجنون

قال لهم : إزاي ماجتشِ ، والروح معلّم لونه ف الفنجان؟!!

حتى شَمّوا

هتلاقوا بارفانها الباريسي

لسه جايب آخر الشارع . . إزاي ماجتش؟

طب مين اللي شغل أغنيات (مارسيل خليفة)

وفضل معايا بنرقص امبارح لواحدة الصُبح؟!

وازاي اختفت نُص علبة سجائري

مع إني مادختش

إيه . . عفريت شربها!!

كل الحكاية انكم خايفين

رافضين تشوفوا المشهد الكامل

لواحدة بتقابل حبيبها

كان كل يوم يعمل كده
وكانه من فرط القلق رافض يحونها
كنت بحلم يوم اطوله واسأله :
كان إيه شعورك
وانت بتعدّي الطريق دلوقتي وبّاها
بدونها؟! .

عند باترينة بوتيك
كان كل يوم يبجي ويُبصع الأسعار
ظابط ذراعه الشمال على زاوية قائمة
وكانها حطّت إيديها الطيبة ف إيديه
ماحزنش على نفسه ف ساعتها
بس فعلاً
شفت كل المانيكانات حزنت عليه .

عند بيتها
كان يباخذ وضع متداري
عشان يعرف يبوسها
وعشان يجوز أمها
تطلع إلي البلكونه نفس الوقت
بصيت له يومها من بعيد واحترت
قربت اهلوس
قربت اصدق إنها
ماباعتش بيتها قبل ماتسافر بساعة
قربت اصدق إنها كانت كما بيحكيلي فعلاً
كل يوم تبعت جواب مقفول لبرنامج المفضل ف الإذاعة

الحقيقة

هي سافرت

بس سابت واحدة تشبهها

واحدة ساكنة ف ذكرياته وبس

أما هو

هو تغريد العصافير الحزينة ف القفص

شبه التماثل للشفا من شخص مش عيان

هو

سعي الاخطاوي للوصول للامكان

هو اللي ممكن يقلب الواقع برفضه

كل مايواصل متابعة فيلمه بجنونه ودأبه

أما انا

قررت اكون شاعر نبيل جداً

بطّلت اراقبه .

ف الدور الثاني من الدنيا

ف الدور الأرضي من السماوات

كان فيه واحد ميت عايش

بيتابع ناس عايشين أموات

طلع الموضوع من فوق أحلى

من فوق بتبان كل الأشياء

أبسط

أسهل

وبدون تعقيد

موقف بيكون كله ببيكي

وانت لوحذك مبسوط وسعيد

كإنك واقف تتفرج على حوض السمك اللي ف بيتكم

و كإنك بالونة هيلوم

فلتت من ايد عيل بشويش

من فوق بتبان كل الصراعات

أبعد من فكرة أكل العيش

من فوق برضه

بتبان الدنيا صنية شاي

والناس حاوطوها بـ سيب وانا سيب

الراحل منها يقوم بدري

والباقي يحاسب ع المشاريب

والفاضل منها يادوب سيرة

وحسن مسيرة وتهريج ونخب

الفكرة انك من فوق دائماً

بتشوف احسن

والساكن ف الدور التالت

بيشوف العرييات حشرات

ويشوفكم لامؤاخذة يا حضرات

كما سرب النمل ف شق جدار

من فوق الشيء واضح للعين

فيا اما الجنة يا اما النار

طلع الموضوع من فوق اثبات

ان اللي بيحصل تحت هزار .

مشهد ٥ خروج عن النص

موسيقى
يحلّي أ.ه. اسكندريلا

"كان وقتها (المخرج ييثبت) الشهر.. والصورة أوضع من زمان بكثير"

عن التحرير

عن الشمس اللي خرجت من جيوب الناس

عن الفجر اللي نام ف محطة الركاب

بيجمع كل قلب اتساب

ويجمع كل ثمرة خووخ بتشرب من مبيد سرطان

وكل شيطان ماجاتلوش فرصة يبقى ملاك

تسمي الثورة إيه ف الكبت؟

اسمها " ندى الشباك"

تسمي الثورة ايه ف الشوق؟

اسمها " هنا ف هناك "

واسمها مرور الضي م الاسلاك

واسمها حاجات تانية

تكونلك لو ماكونش معاك

صباح الخير علي التحرير

قمر علي شكل قرص كبير

ألوف خواجات وكتيبة

وشربية

أساتذة عربي ومحامين وحبية

بتوع حمص وهلبية

مشايخ شائلة نور الله ف عمّتهم

عيال جايين بعمّتهم

يشوفوا النور من المنبع

يبوسوا الأرض من مركز هتاف الأرض

ويصلوا بعيون خوفهم من المجهول

صباح الخير

علي الخوف اللي ف القاتل من العند للي ف المقتول

وع الأرغول

وع الناي اللي بات سكران وقام طاهر

بيعمل نفسه متظاهر

ويعزف والجميع كورس

ويهتف والجميع يسمع

هنا " حيث ان نقص واحد نقوم نجمع "

ولو قل العدد بيزيد

ميدان بيعد أمواته من المواليد

ومصر بتنفجر ثورة ف كل وريد

"هنا المخرج مثبت لاور علي ضحكة فريد الريب.. ووخان السيجار الكبر كتم
من نظرة القاضي"

كان شاب م الأرياف منزل جسمه بره القطر

ينظر بعينه الطيبة للنور

شايل ف جيبه بنت من عمره

وجاي بيسأل عن أبوه اللي اتقتل عابر

وعاش صبار ومات صابر
ودلّوه الشباب علي أول التحرير
وطن فعلي
بلد بضمير
ومر ماين ألوف الناس
كخيط دخان بيدخل للرئة فجأة!

"رئيس الجمهورية جبان.. بيقتل فرحة السكان.. ويبيع الرقيق مغشوش"

يمر هتاف ماين بنتين
ييصوا البعض باستغراب
واي اتنين تمر الثورة بينهما / يبقوا صحاب
واي اتنين كتافهم تتسند ف الخوف
يبقوا اقوي م القناص وم المولوتوف
ييص العسكري بعنيه من الخوذه اللي على راسه
يشوف صاحبه اللي ف الشارع

بيفقد باقي انفاسه

وبيموت والميدان يعلن حداد ممتد

"نروح الجمعة ياميخائيل بلاش الحد"

"نروح الجمعة يا ابانوب وبرضه الحد "

كنيستك ف الميدان أوضح

صلاتك ف الميدان بستان

يعدّوا وخلف منهم شيخ يقفل ضلفة الدكان

وطن بيصب بالكامل ف حضن ميدان

"هنا القاضي نظر بعنيه إلي الشهرا وخبي الصفقة ف الرستور وقال اللهم"

عن الأم اللي مات منها اللي كان منها

عنيها النور ف وقت ماقتلوا نور عينيها

بتقعد ع الرصيف تحسب برود الوقت

وتستني السما تفتح عن العدل اللي تستناه

تبص وبدلة الظباط بتظهر من بعيد جداً

وتبدأ بعدهم صفحة ف كتاب الصبر والمأسة

تلاقي القاضي بيغادر

وتسمع طرف لحن حزين

وطيارة الرئيس بتطير

وتعظيم السلام ويآه

..سيناريو بديل ..

شباب طالع بروح الجيل

يبوس علي كتف أهالينا

غلطنا متنا فينا

بنكتب فوق جبين الليل بإن الحل ف الطلبة

وان الثورة ليها فصول ولم تخلص

وفاضل فيها فصل أخير

من التحرير

خروج

ايه اللي وداهم هناك؟

اللي وداهم سعادتك
حزنهم قدام سعادتك
وانت نايم زي عادتك
محك المليون معاك

اللي طالبه من جنابك
سيب لعم الحج نابك
طق وحدك من جنابك
واترك اللقطة لسواك

اللي طالبه بلاش تعيهم
يكفي ان الموت تايعهم
هما ميزتك وانت عيهم
مرضوا هما عشان شفاك

راحوا يحكوا مين قتلنا
يذكروا يوم ما اتقتلنا
لما شافوا الموت أتا لنا
قررنا يموتوا فداك

ده اللي وداهم هناك

{هامش}

انا اسمي محمد محمود

المهنة: قنيل مشكوك في طريقة موته

وفصيلة دمي: بارود

اعرف أشخاص بالاسم

مروا جماعة بعلب الكشري واخاني امام

واختلفوا مع الحاكم علي مفهوم الامه العام

وافترضوا الأرض

بالطول والعرض

وانطلقت ميزكا خزينة قبل الأحداث بدقايق

انا اسمي محمد محمود

باشنكي من جرح في صدري بطول الشارع

وبضيق في الشعب الهوائية من أثر الغاز

باشنكي من دم قديم ببسيل م الثورة لحد الان من غير تحديد للمصدر

اختلفت روايات العسكرة عن سبب الموت

واتمسحوا الشهدا من الدفتر في غياب القائم بالأعمال

واتقفل الدفتر في حضوره

بعد ماوصلوا معاه لـحلول " بـخصوص الحافر ومكان دائم في المجلس

الباب اللي يجيلك منه الغاز – سدّه مجاز

واسند منصرف على أقرب حيط يشبهلك

الدولة خلاص مايقنتش في حاجة لشهدا جداد

مايقنتش في حاجة لأموان أهاليهم ياخدوا تذاكر حج وعمره

وشوارح تبقا باسميهم

الشارح لازم يتسمى باسم القناص

هو الطلقة اللي بتشرح عز الضعيف بصوت مكتوم

هو الواحد وانت كثير

هو السيد وانت العبد

والمشهد ده ضروري هيتفحص

علشان يرجع هذا الشارح لطبيعته

سأكت

خامل

يصلح لمزور هوكت

وليبغ كتب الأدب الساخر فوق الرصفاه

انا اسمي محمد محمود

شاهد علي آخر عشوة مايبه آتية اصحاب

شاهد علي اخر كوباية شاي

شاهد علي ناي مخروم حزناً مشك لجل العزف

شاهد علي واحد مات منضاف بالحرف

شاهد علي نرف لألف وريد مع بعض

ازاي حولتوا الموت كونشيتو بهذا الشكل

اختلط الدم بطعم الأكل

واختلط الحابل بالنابل

انا بهتف وهتافي قنابل

وبموت م الخوف مشك م العسكر

لكه خايف ل يقول العسكر لحبيبتني اه انا قاتل

طب فيه قاتل بيوسج صدره لغاز مسموم ويبهتف قدام الجرينوف

القاتل عنده ثقافة الخوف

القاتل أضعف م المولوتوف ويبهتف م الثيف البويا

والله انا خايف علي ابويا

انا جيت خايف يكتشف الشارع عه شرطي يواجه أختي

وتموت فرحاً مع بصلته

جاء اسحب م الشرطي سياطه

اياك تنكر دم الميت.. حتي اه شكيت

فما بالك لو كاه الميت جارك والبيت في البيت

والباب في الباب

الموتي جميعاً كانوا شباب

ووشوشة نقرح في حضور

فازاي تبعد في غيباب

فتش في صدور الموتى واحد واحد

طبع اسماء السكاه واحد واحد

ازاي اصبحت سليط جاحد

فتش في صدورهم مع قهوة

واتنيه شيشة مع حلبة حليب في الصبحية

فتش مع بنت جيران

فتش مع معني الانسا

مع اخر ماتش في ليل رمضان

مع اخر دعوه لامه وهو بينزل ربنا يفتحها في وشك وتعود سالم

فتنش في صديدهم على ظالم عينته حكيم

واختلط القاتل بالقتول

الشرح يطول

والسيرة تبدأ مايتخلصت

العمر يمتد ماينقصت

والراوي هيطلج وهيعله كل التفاصيل

القاتل بقا مع خوفه قتيل

والشارع فاضي الا

لمرور هو كـب

وليبع كتب الأدب الساخر فوق الرصفا

المصرية وفتي أحلام الربيع

الأولة : حاسب

والثانية : وجعك

والثالثة : أبشر

الأولة : حاسب علي قلبك يامينا

في عسكري جه وراه

والثانية : وجعك بسيط دافي

ومالوش ف قوله آه

و الثالثة : أبشر ياعم

الموتة ف الميادين . . بتتحسب بصلاة

رصاصه قالت لمينا : ليه ماجتش يمين

قال : لما اميل هاحيا ويموتوا ناس تانيين

الطلقة أنثي وليها قلب وبتشعر

الطلقة شايقة وعارفه رايحة تضرب مين

شارع عمومي يامينا واحنا سكانك
سكان حزانى شافوا الضحك وماضحكوش
ضحكنا ف البيت اللي كان مفروش بأحزانك
وعلينا دمين ايجار لسه ماتدفعوش

وقفت بهدوء الحكيم بصيت علي القناص
مليتّه رقم البطاقة وقولتله اسمك
كريم يامينا حتي كرمك ع الرصاص
رصاصه مش لاقية السكن /
سكّنتها ف جسمك

عملت سيرتك حصيرتك ف اجتماع الشاي
يكفيك يامينا انك انت مُت موة ناي
دمعك بياتي أصيل ودمعتك م الرست
ونزفت خلص النيل في وقت ماخلّصت

أنيت كإنك كمنجة وترها تاه منها
كمنجة وقفت بتعزف والكل تاهمها
فارس يعاتب مصر بالحب والنشأة
لكنه ماعاتبهاش ع اللي أتاه منها

أرثيك يامين صحيح ولّا احسدك يالئيم!
مشيت بدون أسئلة من غير لاسين ولا جيم
لا سألت عن اعانات ولا قطن لاصابتك
حببت تفارق فارقت
وقلت تمشي مشيت

اخترت وقت مناسب يا أيها العفريت
بصيت عليك يومها كان الميدان واسع
وكنت واقف كإنك فتحة جابت نور
قناص بيشرب سيجارته ف شرفة ف التاسع
ومصر فاتحة الزراير ف انتظار الدور

قلبك نزل ع الأرض عند مدرعة
طلع لسانه و غاظها قبل ماينداس
النور سواد طالل م الجهات الأربعة
والبرد نايم فريسة لحُرقة الانفاس
الموت بيعرف صحابه بالاسم والهيئة
لو الميدان بيدور
كانوا ماتوا نفس الناس
أشهد بإنك مقاتل من طراز فارس
أشهد بإنك نوارس في امتداد البحر
وعنيك غُنا " اسكندريلا " ف الميدان العام
باعوا العساكر ترايبها بالرخيص يا صديق
وانت ابن سوق عارف بلدنا تعمل كام

بكّاي وباسم وقاسم للجراح خُبْرُك
وعنيك دموعها بسيطة لأتُري بالعين
عرفت وقت الموت تموت بره حجرك
ودماك بتزرع كفوفك ياخضر الكفين

أشهد بإنك يامينا

مُت وانت ارق

كان " جاهين " باكي و " نجم " بيتابع

" حداد فؤادك " يامينا

لم ييطلّ دق

علشان كده ياوديع / ياطيب الطلة

فضلت توسع لوحذك / والميدان يضيق .

وبقول لكم :

البحر أقرب من جميع الناس

والبحر بالنسبة لوحيد هو السكن

البحر مش ذنبه اللي عدوا من عليه رايحين لفين

وبين غروره وقسوة الماشيين فوقيه م المستحيل تلقى ارتباط

البحر بحر

لو شُفت موجه بيرمي ورد للعشاق

أو كان بيرفع حاملة للطائرات

البحر بحر

كنت في عزلتي

باجي هنا ومعايا بعض حاجات

أقعده وحيد ع الشط واستسلم لحزني والندى

ع البحر

أمي وهي خايقة عليّا م الغرق الأكيد

قالولها من سنوات :

(إبنك هيغرق ، لأنه لما ينسحب بالموج بيخجل م النداء

وبيحترم صمته كده

خجله بيظهر غصب عنه ويلحقوه أول مايعرق

إبنك هيغرق)

وافتكر من غير ماشوفها إنها

كانت بإيدها بتكتشف هل في خروم في المركبة أو لأ

وبأنها كانت بتوصف للنوارس شكلي بالتحديد

ف ان غيبت عن عينهم ينادوا بسرعة للغطاس

ويلحقني إذا أمكن

ع البحر ، قعدت وفردت رجلها زي الأميرة

ماعرفش عنها

غير انها ساكنة ف طرف المدينة

طرفها الدفيان - أكيد -

وبإنها من أصل لبناني

زي صاحبي ما قال لي عنها

قال لي حاسب مش هينفع

والحقيقة اني عارفك

مش هتهدى

قلت له : لو كان بإيدي يا صديقي كنت أتوب

الغريبة لما كانت تتجه لبلادها وقت الصيف

ماكانش يجرؤ قصف جوي

يقلق الناس ف الجنوب

لما كانت تبسم كنت باصبح شخص ثاني

شخص غير

زي راهب جوه دير

والسنة دي شفتها ع البحر مرة واختفت

وبقول لكم :

ف البحر عزلة هو ماقصدهاش

والوحدة زي البحر زرقة بس غامقة

والبحر وحده هو أدري م الجميع بالسر

هو اللي كان بيكسر المركب بخفة

لجل اشوف أمي بتخشى الموج عليها واحس بعطفها

وهو اللي كان بيصورّ البنت ف خيالي وردة صابحة

و كنت بنجمل منه جداً

فلا أحاول قطفها

البحر بحر .

باكتب لكم

بدمع السيدة اللي اهتزّ خوفها بين حروفها

وهي قدام المقام

" سدّد خطانا للندي ياسيدي "

باخشى الاغاني الميتة والليل طويل

خائفة ماموتش زي أمي عند عتّب البيت

والبيت

اذا شاف ميتة عند العتب

يسحب ايديه ويشده للأوضه أم أكره نحاس

ويسيبه على كرسيه وحيد

ترفع ايديها السيدة

والطفلة ماسكة ف طرف جلبابها

ممكن تقف سنوات هنا

لو قررت تذكر جميع اللي رحلوا ضمن احبابها

تدمع عيون السيدة عند المقام
(مش عارفة انام ،
ازاي اغمض والعيال نايمين بدون عشوة الليلا دي
والسنة دي طاحنه فينا جفاف)
خايقة م الآتي الغريب
من كل شيء لاشيء
وابقوا اسألوا اللي انتظر ليه لما فكّر خاف؟
ليه ماتبكي الطفلة قدام المقام تنزل دموعها بين عينيا تبلمي؟
ليه لما تسند كفّها فوق الخشب بتمسّني؟
واقف هناك جنب المقام وعلاقتي بالمقامات طفيفة
كانوا الرعايا بيسألوا فين الخليفة
والصبايا بيمسحوا دموع أمهاتهم
كنت بسأل ليه فؤاد حداد ماسابش خطواته هنا عند المقام؟

خاصة ان شاعر زبي مثلاً
مش هيقدر يسرد القصة لآخرها
وان سردها ربما تتحول القصة لنقيضها عن جهالة
أسف هافارق قصتك
وهاروح واسيبك تذرني دمعك وخوفك ف المقام
وحدك ياخاله

الشعر خارج من هنا
حتى ان قصدت تكون قصديتي مجردة
حتى ان صبحت ف نظرة الأصحاب
أرستقراطي جداً ف القصيدة
الشعر خارج من هنا بحاجات جديدة
والفرق بس ف نظرتك للمشهدية البيئة
علشان كده فلتسمعوا

هنا

وبدون ماتقلق

رفعت ايديها السيدة عند المقام

وعينها شائلة الورد من وسط الفازات وبتنطلق للنور

تشعلق البنت الجميلة ف طرف جلبابها

توهب ايديها السيدة للبنت

تضحك

تفتكر أول مادخلت سينما بايدين أمها

أول ماراحت فصلها جنب أمها

واثق بأن اللحظة دي حصلت هنا

وانتوا أدرى من غريب زيي عن المدن البعيدة وشخص

جاهل بالمقام

انتوا أدرى من مجرد طفل بالغ قرر يغيب عن كل شيء

ويذكر الأشياء كما شافها هناك

علشان كده فلتسمعوا

الشعر خارج من هنا

مش من هناك

من غرسة الأطفال ف وحل ف حي عشوائي

من فرض الحصار العسكري خوف التلاقي

من فرحة العيل ف عز الليل بلبس العيد

من ثلاث ستات يبحكوا عن حياتهم عند عتب البيت

والبيت إذا شاف ميتة عند العتب

يسحب ايديه ويشده للأوضة أم أكرة نحاس

ويسيبه على كرسيه وحيد .

{هامش}

احنا الصاحيبيك لنهابة الليل
احنا اللي جراحنا تهد الحيل
ربنا يلقىك شم التطبيق والقعدة لوحك بتفكر
الليل ملعون يطارد فيك ويطول أكثر م العادة
الليل فنجان " وحدة " زيادة
تنظفي روحك زي سجارة ماتت على طرف السجادة
ربنا يلقىك شم الحكايات بالذات لو كانت ما بتقالش
ربنا يلقىك شم البدايات بالذات لو كانت ما بتكلمش
ربنا يلقىك شم الاحزان بالذات لما بتحول ألسه
ربنا يلقىك شم اللي ما قالش
عه هم بيبدأ آخر الليل.

انسان آلي

واقف يتفرج علي عمر سريع بيعدي

معدن مركون ويستخدم

فلا منه سليم ولا منه مصدي

انسان آلي لو هزيتة

ممكن يغرق هذا العالم

لو هزيتة

تنزل منه كمنجات ، وبنات ، وشوارع ، وحانات ،

وفؤاد حداد ، ومساكن شعبية

انسان آلي

يعرف امتي يعيط تحديداً

امتي يسيب نفسه لشارع

انوار عمدانه بتفضح مساكنه

وبيوته امّا بتعرق بيزيلها الحي

بيداري بجسمه المعدن قلبه النّيّ

أوقات يكون شجرة
يقصدها العشاق والغربا وبنات الليل
شجرة بتقعد ع القهوة وبتشرب شاي
شجرة اتخرمت من أثر الحزن فاتقلبت ناي
وساعات يكون وردة بلاستيك
بتراقب بوسة حميمة ف بير السلم
لاتنين عشاق دمعتهم سخنهم وايديهم باردة
وردة بلاستيك
لكن لها روح . . علشان آمنت انها وردة
انسان آلي
مؤمن بالله حد التفكير ف وجود الله
مؤمن ان الشمس بتشرق بيضا
وبتصفّر بفعل صحاري الغربة والحدق البشري

مؤمن

ان الدخان بيزيد كل مانبعد عن مجرى النهر

كل مابنسيب اجسامنا مساءً ف الخمارة

ونروح للبيت اجسام من غير ارواح

دخان، دخان بيزيد

دخان ف البيت ، ف الشارع ، ف الفتارين ، ف عيون

الناس

دخان بيطل من الحواديت

دخان ف الشعر ، ع القهوة ، ف الميادين ، علي نمر

العربيات

دخان ف الروح ، ف الاغنيّات

دخان ف السوق ، ف البحر

دخان ف الصحرا

ف الموت دخان بنقول عنه بياض الغامض

ف الليل دخان بنقول عنه بياض الاسود

ف النور دخان بنقول عنه بياض التأويل

لو كان نرسيس ركز حبة

كان شاف الدخان طالع منه

كان فكّر ميت مرة قبل ما يُعجب بملاحه

كل الأساطير دخان

دخان أبيض / للروح

أسود / للعتمة

أزرق / للكدمة

أصفر / للصدمة

أحمر / للطمّة

أخضر / للشعر

على قد ماتفهم ألوانك
 علي قد ماتصنع دخانك
 فبتعجب ليه لما باقولك اننا اموات
 وبتعجب ليه لما بقولك اننا ادوات
 وبتعجب ليه بس حبييتي
 لو تحضنني يوجعها حديد جسمي
 لو كنا بنختار علي كيفنا
 كنا بقينا جميعاً ازواج صالحين
 أو شعرا بتوصل قصايدهم للناس
 أو ثوار صنعوا بلادهم بعد ماماتوا

 لو كنا بنختار علي كيفنا
 كنا عرفنا
 ازاي نضحك . . . من غير مانعيط .

من أجل ده

باكتب لكم

عن أغنياتنا وفرحنا

عن خوف قديم وهروب جديد

عن ليل طويل اسمه الحياة

عن برد أسرع من دخولنا للدولاب

وخروجنا منه بشيء باسميه الدفا

عن أمهاتنا عند باب النهر ييملوا جرّاتهم حنان مكتوم

ويقضوا الليل سكون على طرف شرفاتهم

بيونسوا الكروان ويلملموا رفاتهم

ويضحكوا لله

هذا اللي عجزّ سميناه الموت

كان اسمه من سنوات

حياة

من أجل ده وف عزلتي

باكتب لكم عن قصتي

وبسبب ايديا ع الأكر مستني واحد منكم يدخل عليا

بالكتاب

هل قالوا عن بعدي اني مُت؟

هل قالوا غاب؟

هل قالوا بطل شعر؟

هل موتوا أبطال قصايدي كلهم؟

أم فعلوا ايه ؟

وبقول لكم :

الشعر لعنة ممتعة

وإن صوت السيمفونية أعلى دائماً

ووشوشنا وقت ما ينتهي صوت الآلات

تتلاشى وياها

م البسيط بنهج ، بقلوع المراكب ننطلق

قاصدين أمل يمكن

قاصدين متاهة

ننكسر نقوى ونقوى ننكسر

احنا أضعف مخلوقات الأرض / أقواها

كل من مر ف حياتي خد مكان ف السيمفونية

حتى لو أبسط كثير من إنه يحتل المكان

قلت :

باسم كل المهزومين بالأمكنة قررت أهاجر

ارمي روحي للشواطئ والشوارع

اسمي : اسمي

جسمي : هالة من قلق ودموع

قلت أهاجر

باسم أنصاف البشر ف المولد الدنيا

أعلن الأسماء وبالتفصيل

نوع بيوتهم ، لون وشوشهم ، فولكلورهم ، حلمهم

عن ناس بتخرج م الحياة

أول ماتخرج للحياة

قلت أهاجر

لجل ما أجمع أغنيات من لحم أهلي

من مراكب ولعت ف البحر

منتظرة الحقيقة واختفت

قلت اهاجر

لجل ما اخرج م الدواير للصدى

واصنع بداية تليق براحل م الجنوب للبحر

قلت ادوّن ف الكتاب اخر آيات الروح

واعزف لوحدي ع الجبل

يسمعني عابر أو ميسمعنيش ماتفرقش . . . عزفت

بانزف لوحدي أو معاهم مش هتفرق

اسمي ف الحاليتين نزفت

بالتشابه قلت اجازف باختلافي

فاختلفت

يبقى مش حلم اللي شفته
لما كان طيف المسيح يشقُّ نهر ف أرض بور
والحمام بيفرم الأبراج لحجر الناس
كانت أغاني ملهمة
بترتب العصافير على الصبح الجديد
والموج بيغسل هم عشاقه
يبقى مش حلم اللي شفته
لما كانت قوقعة تشبه مدينة بحملها
والسر أوسع من غرور البحر ف النوة
كانت بتسكن حضن طفلين اترموا ف البحر
مع انهم ما بيعرفوش العوم
قال لها : ما اعرفش اسمك
فابتدت ترقص
كان غرور الموج بيخشى رقصها
وبيحترم فن اختيار الاسم بالرقصة
(١٩٦)

رقصت كأن الليل يشرب من قناية صبح ع الشباك

والصوت بيخرج من لسان أخرس

يطيح بالساكيتين

قال لها : ما اعرفش اسمك

بس عارفك

تفكر للدنيا كام مخرج هناك

ما تقولش واحد

كلنا مش شكل بعض عشان نقول نفس الأسامي

كلنا مش شكل بعض عشان نغني

تفكر ف اليأس كام بوابة تصلح للتمني

جائز ثلاثة (ليل وخوف وسكون)

- تفكر.....؟

- جائز

قلت جائز

بس سييني للمشاهدة
سييني للصلصال ياخدني واكتشف أكثر بعيني
سييني وحدي ف عزلتي
سييلي النوارس والطريق للبحر
فكرني بامي والأغاني البكر قبل مانصطدم بالليل .
وبلاش تقول لي
ان اهلي كلهم باعوا الصلة
واستسلموا للبعد قاصدين البعاد
بلاش تقول لي
ان اقرب حاجة ليا
هي أغرب حاجة عني
وبلاش تقول لي ان صوتي نشاذ
واسمحلي اغني

انا هافتكر كل اللي فاتني ف رحلتي

رحلة العشرين محاولة

والسبعناشر نظر

هافتكر دخلة أبويا بالجوافة والفراولة

والفزع م الجي

تزيياً عجلته

لما يدخل عند باب الحي

صحابي ف شارع الفقرا

وليل إبريل

إذا يكذب علينا بحلم ضي

هافتكر تونس

وهي بتعترف بالشعر ف حضوري وف غيابي

هافتكر ياسمين

صبية تونس العذرا

وضحكتها البتول

هافتكر كل الإناث اللي احترمت القرب منهم واعترفنا
بالتعري

هافتكر بلدي اللي وافقة ع القنال

بتنشر النورع الحبال

وبتنشي بالسسمية

هافتكر اهلي وهما بيكتبوا الجوابات

وبيعبوتوها بالحمام الزاجل الميت

هافتكر (بيريهان)

وهي بتتفق ويا المطر على صفقة كسبانة

لو هي مرت من هنا ينزل يغرق شارع الفوانيس

وقصاد كده

هي هتسمحله يلامس جزء منها

لما بيعجي الريح ف مارس كل عام

يلمس حواف الجيبة وياخذها

وبيان صهيل النور علي جناح السما

هافتكر كل القهاوي اللي انسحبت بخفة منها

وسيبثها للذكريات والفحم

مؤمن بأن الماضي آت

والذكرى شحم ولحم

علشان كده

من عزلتي وانا وسطكم

باكتب لكم:

الشعر لعنة ممتعة

والشاعر الموهوب ييكتب جهله باستمتاع

الحب وردة ونبتت على طرف بلكونة قتيل

دبّت ف روحه الروح فعاود باندفاع

الشعر / فكرة أوسع من جراحه وبهجته

واخر مايشغل نبي

الصدق م الأتباع .

{هامش}

خذها قاعدة :

أي واحد جاب فراشة م الجنية وخطها ف البرطمان

ثم فكّر انه يحافظ عليها...

ذنبه فيها

دمها الألوان هيفضل شيء يطارد

أصل برصه / مشط طريقة عشان يصونها!

هو ممكّن عجيبه لونها

قال يجيبها تموت قصاده بالبطيء

واتما ماتت هو عيط

والجميع حسوه برىء

شالها يابيه ثم خذها

للغوا وراها تاتي

نزلت الألوان بتنزف

برتقاني ع الطريق!

قصة الحب الكبيرة..
صورك السيلفي الأخيرة..
اتصال بالليل يضايقك
تزعجوا / تفصّوها سيرة
انت طبيب
بس مخامض
هي حاوذة حاجات كثيرة
وانت ايه غير " سكر بيه"
من حياة منطقها بيرة!
شكل أومضك
لون هدمك
ذكرائك
نقطة الصفر ف حياتك
السياسة
والأغاني
والجوامع
الاضاءة الخافتة والمزيكا وانت..

- اعمل ايه لو توحشيني؟
- انسى واعرف واحدة ثانية
- بس انا شايلك ف عيني
- حظنا نبعء، دي دنيا!
- انتي قصدك تقتليني
- انت ميت كل ثانية

المحطات البعيدة

شنطة السفر اللي فيها ريحة الناس والشوارع

جلدك اللي مسامه شايله

نقطة مع عرق اللي راجع

الحياة رجمة وكئيبة

بس حلوة وليها معنى

احنا باب ندخل ف نخرج

والجميع شدد ورزحنا

احنا بالفعل اتدعنا!

كنت واقف والشوارع ليلا ووحدّة

كأن صبحاي كلهم راحوا لبيوتهم

كنت وحدي أو معاها

أو..

معاها وكنت وحدي

كلّمني عن قمم سائك سماها

وأنا لمست إيدي فجأة

تابع القمر المفاجأة

خلى نور الفجر يتأخر شوية

ثم غابت

ثم رجعت

ثم دابت بين إيديا

واكتشفت بأنني وحدي أو معاها

أو..

معاها

وكنت وحدي

الطيب النفسى ممكنه
 ينصحك ويهتف فيك
 بس مش ممكنه يقرر
 اللي غايوا يعودوا ليك
 واكتئابك
 رد بابك
 سببت كل الناس وغيب
 واللي سابك اسمه سابك
 انت عمرك يوم ماسبت
 قهوة تاني
 وانسحابك للصور علشان تعاني
 ناس كثير ف الصورة مشيوا
 وانت مجني عليه وجاني
 تكتشف انك كاتك كنت منك توهت فيك
 ثم تفهم ان بكره باب واكره هيجي بيك
 وان خوفك لو يشوفك عمره ماهيزهق يجيك!

- طب وأبويا؟

- يرحمه ربك ياخويا، شال كثير وارتاح فسيبه

- طب وهي؟

- هي باحت واللي باح ياخذ نصيبه

كان ساعتها قلبي واقف والرماد ثابت مكانه

بكره فيه كاع شيء، كويس يستحق اعيشه عشانه

طفل مملك شبعني جداً

أو زيارة عائلية

أو مطر هبيل روجي

يمسح العفرة اللي قبا

أو ثلاثة أصحاب ف مصيف

يحقوا صباغي الصغير

يقنعوني بشيء مزيف

أو يراهنوني بغياهم

واما بالكسب ما يغيبوش

فيه ف بكره شيء حقيقي

مستحيل بالخوف ييوش

بالقياس

فيه ف حياتنا ياما ناس

موتونا بحُب زايف

حُب آخره يكون كلام فوق الشفاف

كتقونا بانهم ماسكيه إيدينا

يعشقونا في سجننا مقفول علينا

وامّا تعطّل حاجة فينا

يسحبونا في الضمائم

كلنا يا صديقي أصلاً

كالفراسة في برطمان.

{هامش}

ضروري

كادر واحد / " ليل داخلي . مستشفى "

أهلك واقفين قدام الباب

ومرض واقف عند دولا ب

بيحضر حقنة بكل هدوء

خالك بيتابع بالتليفون

وأبوك بيرتل م القرآن - سورة الانسان

ويدعي لأمك تبقى تمام

ف الكادر بيان منظر حمام وريسبشان واقف فيه شخصين

ف الخلفية صورة الرئيس واقف متحنط بين علمين

وف اخر الطريقة ثلاث ستات

بيجيبيوا حاجات ويودوا حاجات

وف وقت معين وف ثانية

خرج الدكتور بشهادة زور

ان انت بتضحك للدنيا

مشهد اتنين / " نهار خارجي . مدرسة "

مس نادية جلال
واقفة بتشرح / قدامها عيال
وانت مابينهم قاعد محتاس
(اتفضل قوم ، جاوب علطول)
تتلخبط وقت ماتيحي تقول
يضحك واحد من اخر الفصل
تُخرج جداً وتشيل جواك
احراجك هو الباقي معاك
من طفل قديم كان يشبه ليك
تعرف معاليك!
كان شكلك أبسط من دلوقت
غيرك الوقت
بدلك المشهد والتفاصيل
والفاضل منك نص قبيح
دايماً بيفوز على نص جميل

مشهد ثلاثة / " ليل خارجي . النيل "

انت وهي وبتاعة الورد
حضنها دافي وبينشع برد
والناس محشودة بفعل الجرد
بتقرب منها وهي بعيد
يبان ف الكادر اتنين ظباط
ويبان بالصوت تهريج وعياط
وبطاطا بتلبس بالطوشياط
وبتدفن روحها بدون أسباب
واقف قدامها ايديك ع الباب
وعنيك ع الشارع والماشين
خايف من مين؟ خايف على مين؟
كلها كام يوم ماتكونش معاك
وتكون مع غيرك عند النيل
هي وهو وبتاعة الورد
حضنها دافي وبينشع برد
والناس محشودة بفعل الجرد
بيقرب منها وهي بعيد

مشهد أربعة " ليل داخلي منزل "

شكلك عجزت !

ما بقيتش خلاص عارف ترتاح

مشروع طائر باقي منه جناح

ومعاك أسرة بتعرف ترضيك

وتعذب فيك

ومعاك أولاد شبهك مجنون

ف المنظر اه مش ف المضمون

ف الاوضة مراية بحجم عنيك

وهدوم احلامك واسعة عليك

تضحك والشيب بيعاكس فيك

والدنيا بتلعب بيك طاولة

فاضل ف الروح اخر جولة

فاضل من كل الماضي حاجات

شارع وبنات مجاذيب وذوات

وازايز خرة وصحبة سوء

وتاريخ مسروق

واغانی کثیر مالہاش اصحاب
الماضی بعید و کاینہ سراب
والجای سراب ہیکون ماضی
فیدور " زمبلکک " ع الفاضی

مشهد خمسة " ليل داخلي . مستشفى "

أهلك واقفين قدام الباب
وممرض واقف عند دولاب
بيحضّر حقنة بكل هدوء
بتك بتتابع بالتليفون
وأبنك بيرتل م القرءان - سورة الانسان
وبيدعي عشانك تبقى تمام
ف الكادر بيان منظر حمام وريسبشان واقف فيه شخصين
ف الخلفية صورة الرئيس واقف متحنّط بين علمين
وف اخر الطريقة ثلاث ستات
بيجيبوا حاجات ويودّوا حاجات
وف وقت معين وف ثانية
خرج الدكتور مهزوم ويقول
ان انت بتخرج م الدنيا .